

說

郭

續

說郛續目錄

目第二十五

瀛厓勝覽

馬觀

海槎餘錄

顧芥

吳中勝記

華鎰

泉南雜記

陳懋仁

南陸志

崔錄

貴陽山泉志

慎蒙

雲南山川志

楊慎

言平集 金 卷二 三

金陵紀畧 羅洪先

蜀都雜抄 陸深

豫章漫抄 陸深

瀛涯勝覽

稽山馬觀

占城

國在大海南南距真臘西距交趾東北際海自閩之
長樂縣五虎門發舟西南行順風約十日可抵其國
國東北百里許有海口曰新洲港者港岸立石塔爲
標舶至是繫焉有寨曰沒比奈主以二酋領卒五六
十輩專戍守焉西南百里至王城曰占城名也城方
有四門門有守者王乃鎮里人也尚釋教頂三山金

花玲瓏冠上衣花布若綿袖狀下縈絲絲帨巾數
匝跣足跨象或乘小車駕以二黃犢其臣頂芟葦葉
冠亦類王冠飾以金絲其冠有品秩上長不過膝下
亦縈絲帨王宮宏壯鼎鑒整紫門豎雕木獸以爲威
儀民居茅茨高不踰三尺曲身出入違制者有罪衣
服紫惟王白服禁服玄黃達者死男蓬頭女椎結于
後肌膚俱黑上禿袖短衫下亦縈絲布皆女裝也男
女俱跣行四時溫熱並無霜雪草木恒青啖檳榔不
忌口如閩越俗議婚男先詣女成偶或旬日或旬有

五日然後父母親黨導以鼓樂迎歸設酒筵酒則醺
甕飯待熟用筒啣之賓主繞甕以次而啣啣必注水
至味盡乃止文字無紙以椎羊皮及黑木皮書之刑
輕則繫以藤重則劓之盜必斷其肱姦不問男女俱
燎其頰極刑則銳木于舟中以罪人順流而下至木
貫出口而斃嚴示衆也年無間月晝夜各分五十刻
以鼓記之王當賀日以人膽汁沐浴將領獻人膽爲
禮王卽位三十年則入山茹素受戒命子姪攝國居
一載則額天自矢曰我不道當克虎狼食否則病死

期年無恙則復辟于是國人呼爲芳嚟馬哈刺札極其尊稱也有號屍致魚者乃婦人也其目無瞳夜寢則頭飛入人家食小兒穢氣侵兒腹必死頭返合體如故移其體則不合而死矣其夫匿不以聞者罪及家屬境有鱖魚潭訟難明者遣詣潭宜者雖往返十數而不遭害傍海山野牛甚狠逢青衣人輒觸之至死蓋亦耕牛奔入山積久而成群然也人則重其首犯之不殺不已市交易以金間亦用銀極寶愛中國青磁器匱段疋綾絹兒則以金易之厥產伽南香觀

音竹降真香烏木尤勝他國伽南香唯此地有之價
亦高觀音竹如藤長丈八尺許色如黑鐵每寸約二
三節犀角象牙甚多犀如水牛大者八百斤體無毛
黑色鱗甲皮厚蹄有三趾獨角在鼻端長者可尺五
寸唯啖刺樹葉條乾木馬小干驢水牛黃牛猪羊亦
產鵝鴨則罕鷄大者不踰三斤果有梅橘西瓜蔗柳
子蕉子其波羅蜜形如東瓜荔枝大如鷄子膚黃味
勝蜜核亦可炒食之蔬有東瓜黃瓜胡蘆芥葱薑民
務漁不務耕種米粒細穎長而雜紅厭貢犀角象牙

伽南香

爪哇

古者閩婆其國有四皆無城郭初入杜板次入厝村
次入蘇魯馬益次入蒲者伯夷王都也王宮四面磚
墉墉高餘三丈方三百餘里門館深嚴屋高四丈覆
地以板蒙以藤花蓆跣跣而坐瓦以堅木民居茅茨
頽皆磚庫坐卧于內王蓬頭頂金葉冠冒紫嵌絲悅
腰束錦綺曰壓腰腰佩短刀曰不刺頭跣行或跣象
或乘牛民間男蓬頭女椎結上衣下悅男必腰刀無

老弱貴賤貧富皆然刀必雪花色鎮鐵鑄之柄飾以金或犀象飾往往蒙鬼面脩極精巧會聚間有犯其首及爭鬪必以佩刀刃之傷死則遁踰三日則免罪當卽捕獲則仍受刃官無鞭朴罪不問重輕以藤繫之必刃以死殺戮爲常不足怪也市易川中國銅錢杜板者曰賭班地名也約以千餘家主以二首間有流寓多廣東漳州人也海濱小池水甘冽可飲號聖水傳云元將史弼高興征閩婆經月不克登崖三軍乏水渴甚二將默禱卓槍于清泉遂湧出軍賴以濟

又東行半日至廝村曰華兒昔者故沽灘地中國人
客此而成聚落遂名新村約千餘家村主廣東人也
諸番舶至此互市金寶番玲充溢居人多富又南水
行可半日至蘇魯馬益港口淡水淺濶僅通小艇二
十餘里始至蘇魯馬益口蘇兒把牙約千餘家亦有
首領間有中國人港口大州林木蔚茂長尾猿萬數
聚于中一里猿俗云孫也老猿爲主曾掠老番婦
與俱國人求嗣者必具酒殺祈于老猿猿食之餘縱
群競食食盡少選猿雌雄交以此爲徵求嗣人回卽

不姓不然無應也又水行八十里至卑頭白潭沽登岸西南陸行半日至蒲者伯夷乃王都也無慮二三百家總領七八人皆王佐也氣候常熱如夏稻歲兩熟坐卧無榻椅飲食無匙匕啖檳榔不離口真飯于盤酥澆之餐則嗽去椰屑向盤掬而食食既水飲待賓以檳榔人有三等西番賈胡流落而久居者服食皆雅潔一等也唐人如廣東漳泉人流寓者食川鮮華率尚回回教持齋受戒一等也顏色黝黑髻頭赤脚崇信鬼道釋云鬼國卽此土人也飲食粗惡啖蛇

蟻虫蚓稍燎以火而已與犬同寢食不以爲穢也傳
云昔有鬼子魔王青頰紅膚赤鬚髮與罔象交而生
子百餘以人爲糧忽雷震石裂乃出一人衆異之推
爲主遂領兵驅罔象鬼子而去由是人得安焉俗尚
武勇歲設竹槍會始于冬十月王偕妻出觀夫妻各
坐一塔車妻前夫後車高丈餘四跪軒窻駕馬以行
至會開場列陣相向各操竹槍勁實若鐵登場者亦
携妻至妻亦操三尺棒相格曰那刺格已被傷斃者
王遣勝者出金鈔一箱償之以媼婦勝者卽已凡婚

姻男遣女家合巹後五日迎婦歸鳴金鼓吹柳筒擁
以刀盾前後甚都婦則裸而被髮跣足縈喉絲悅戴
被金珠絲錦寶粧無不周備姻鄰亦以檳榔花草冥
絲舟助之燕樂數日始散喪事於病革子弟請遺命
或水火葬或犬腹葬昇屍至海濱縱犬殮之盡不盡
拾其遺投水而後已尤慘于水火也有寵妾者誓與
主同往盛粧悲號俟焚骸火熾亦投火死之民間殷
富貿易用中國古錢字書無紙刻于茭葦葉類鎖俚
字以二十兩爲斤十六錢爲兩四姑邦爲錢每邦二

分一筴八毫七絲五忽截竹爲升升爲一姑刺蓋中國一升八合也斗爲捺黎蓋八升中國一斗四升四合也月望番婦或二十餘或三十餘爲輩成隊月下縛臂聯行俚歌唱和遍歷宦戚豪門必投賞以錢又有展畫指畫以諭衆聽環之坐者有笑有哭殊能動人最重中國花磁暨麝花絹綺羅厥產白芝蔴綠豆蘇木金剛子白檀肉荳蔻龜筒玳瑁鸚鵡有綠紅五綵者鷓鴣皆能言又有珍珠鷄倒掛烏絲鳩孔雀珍珠雀絲鳩之類白鹿白猿猴羊猪牛馬鷄鴨亦有之

有芭蕉子椰子甘蔗粗大長可二三丈石榴蓮房
蜜柿即拔若枇杷稍尖中有白肉

舊港

古號三佛齊曰淳淋邦隸爪哇東距爪哇西距滿刺
加南距大山下西北濱海舶入淡港入彭家裏舍易
小舟入港達其國國人多廣東漳泉人流寓此境土
沃人稠地宜稼穡諺云一季種田三季收稻言收穫
廣也水多地少人習水戰將領之家始得岸居民卒
往往筏居繫于桮杙港通潮汝風俗語言一如爪哇

洪武間有陳祖義者廣東人也挈家遁避于此爲將
橫甚標掠過客永樂間朝命太監鄭和統海船至有
施進者亦廣人也具訴祖義于和和領卒擒之祖義
伏誅乃官進仍回舊港爲將進沒其女代之賞罰黜
陟皆從其俗俗好賭博如把龜奕棋鬪鷄皆索錢具
也市亦用中國銅錢布帛之類厥產鶴頂黃連降真
沉香黃蠟金銀如釵花銀器黑色間有白色成色
高者白多黑少低者黑多白少焚之氣觸鼻莫禁西
番鎖里人重之鶴頂鳥大于鴨毛黑脰長腦骨厚寸

餘內黃外紅俱鮮麗可愛火鷄大于鶴頸亦過長軟
紅冠銳背毛如青羊色腳長黑色爪甚利解傷人腹
致死食炭雖繫之不死神鹿大如鉅猪高可三尺短
毛猪摩蹄亦如之三跲抵啖草木不近腥物牛羊猪
犬鷄鴨蔬果之類與爪哇同

暹羅

地方千里環國皆山峭拔崎嶇無下濕土疎惡罕宜
耕種氣候不常或嵐或熱自古城西南舟行七晝夜
方至新門海口入港方達其國王居宮室壯麗民樓

居其樓密聯檳榔片藤繫之甚固藉以藤席竹簟寢處于中主乃鎖里人也白布纏首無衣腰束嵌絲帨加以錦綺壓腰跨象行或肩輿金柄傘葢茱萸葉爲之尚釋教國人皆然僧尼甚多其服類中國有菴觀持齋受戒民俗婦人多智大聽于妻妻與中國人私寢食與同恬不怪也男白纏首衣長衣婦如之乃椎結男年二十陰必候珠玉及富貴者絕金盛珠有聲爲美否則貧賤人也婚則僧群迎婿至女家僧取女紅貼于男額曰利市陋不可言踰三月僧暨親黨擁

檳榔絲舟送歸乃開筵作樂喪禮富貴者則灌水銀而葬民間則昇屍投海洲有金色鳥數十飛來食之有遺棄諸海曰鳥葬已而用浮屠教齊事言語與廣東同俗澆浮習水戰常征伐鄰邦市用海貳一如錢價厥產紅馬肯的石次子紅鴉忽明瑩如石榴子國西北二百餘里有市鎮曰上水邇南居人無慮六百家各種番貨俱有黃連香羅裙連香降真訶水亦有花黎木白豆蔻大風子血結藤結蘇木花錫象牙翠毛蘇木賤如薪色絕勝獸有白象獅貓白鼠蔬果如

占城有米酒椰子酒皆燒酒也厥貢蘇木降真香

滿刺加

舊名五嶼以海有此山也東南距海西北皆岸岸連
山地瘠鹵收穫殊寡故未稱國隸暹羅歲輸金五千
兩否則被伐永樂七年己丑上命太監鄭和冊爲滿
刺加國賜其將領銀印冠服爲王自是不役屬暹羅
王携妻子赴京謝願修職貢上賜舶還其境有大溪
貫王宮入海跨溪橋之構亭于上約二十餘楹交易
來集俗尚回回教持齋受戒王以白纒首青細花

袍蹠皮履乘橋民間男怕首女撮髻于後其體微黑
短衫束腰以悅風俗淳朴民舍如暹羅聯榻趺坐業
漁剝木爲舟泛海而漁婚喪類爪哇旁海有龜龍患
其龍高四尺四足身皆鱗甲露長牙遇之則齧山出
黑虎比常虎差小毛有暗花文虎有能變人形者白
晝入市群行覓者禽殺之古城屍頭蠻中國船亦至
其地柁木爲棚開四門鼓樓夜巡以鈴內設重棚有
倉庫可貯貨五月中方發舶厥產黃連香烏木打魔
香此香乃樹脂墮地成遇火卽然國人以當燈及塗

舟水不能入明瑩者若金箔曰瑩都盧所可作瑁珠
名水珀是已花錫有塲山曰樹沙始其皮如葛搗漉
成粉可作飯渚生水草曰茭葦長如刀狀韌堅其子
類荔枝大若鷄子以釀酒曰茭葦酒亦醉人葉可作
簾席果有甘蔗芭蕉子波羅蜜野荔枝之類蔬有葱
薑蒜芥東瓜西瓜之屬牛羊雞鴨罕有驢馬無

啞魯

南連大山北距海西距蘇門答剌自滿刺加水行四
晝夜可至有淡水港東連曠野地宜早稻其俗小民

業耕漁風俗淳朴婚喪禮與爪哇滿刺加同市易用小綿布曰拷泥米穀牛羊鷄鴨甚豐乳酪亦多國皆回回人也厥產飛虎如猶犬長毛灰色肉翅如蝙蝠飛亦不遠有黃連香金銀香之類

蘇門答刺 那孤兒

蘇門答刺者卽古須文達那國南連大山北距海東亦連山距阿魯國西距海山連二小國那孤兒黎伐是已西洋之要會也自滿刺加西南行順風五晝夜可至先有村濱海曰荅魯蠻舍舟十里可至國都無

滅郭有大溪入海朝夕潮汐海口大濤舶至此往往
沒溺舊爲那孤兒國被花面王侵伐乃出戰敗績中
矢而死子弱不能復讐其妻忿而揚言曰能復此讐
者我則夫之與其國事有漁翁聞之領兵敗花面王
殺之國賴以安王妻德之于是改適漁翁國政聽焉
末樂七年王來貢上嘉之十年遣使入其國假子率
部衆弑王卽漁翁也其子曰蘇幹利領衆奔柳子峭
山時復侵之欲復其讐末樂十一年太監鄭和擒之
送京伏法舊王子感激修貢其地氣候朝熱如夏暮

涼如秋瘴發于五六月間風俗淳厚言語和媚婚喪
服用與滿刺加國同民居亦如之番舶往來貨亦充
物市用金錫錢金錢曰那底兒重五分交易多川錫
厥產硫黃出巖穴山則不生草木土石焦黃地隘宜
稻歲兩稔無大小麥依山則種椒園蔓生如中國甜
菜狀花黃子白其實初青老則紅半老則采之曝乾
每百斤直白金一兩有芭蕉子甘蔗吉柿波羅蜜有
臭葉曰暗爾烏如中國鷄頭菱狀長八九寸有刺熱
則開瓣五六臭如腐肉酥白十五片甚甘有子可炒

食甘橘四時有綠橘不酸柰久不爛酸子白俺拔如
消梨稍長香冽去其皮可食蔬有葱蒜薑芥東瓜西
瓜東瓜久留不敗西瓜綠皮紅子長二三尺黃牛多
有乳酪羊皆黑毛雄鷄大者七八斤易養味美異常
蚕桑不省緣絲但成錦那孤王一名花面王在蘇門
務荅刺之西國小僅比上村人皆面故號花面祗千
餘家田少稻稀育猪羊鷄鴨服用風俗語言與蘇門
荅刺同

小國也南連大山北際海西距南泮里國東南連那孤兒國居民有一二千家乃推一人爲王隸蘇門答刺國操舍一聽之言語服用與答刺同山產野犀甚多

南泮里

國際海東距黎伐國西北距海南連大山山南際海僅千餘家皆回回人也風俗朴實王居類樓高四丈周圍板蔽亦嚴整幽紫下則無壁牧放牛羊之類民居與答刺同市用銅錢厥產牛羊鷄鴨粟粒少蔬果

豐魚蝦降真香甚妙曰蓮花降真有犀牛西北大海
中有平頂巨山半日可至曰帽山海乃西洋也曰那
沒黎舶皆以此山爲指南山下淺水有樹乃珊瑚也
大者高二三尺分枝婆娑可愛根可爲瑁珠器皿依
山有居人二三十家人各稱王有問其爲誰曰阿孤
楂我蓋王號也問者輒以是對殊可駭笑隸淳里國
自蘇門答剌國舟行三晝夜可至

錫蘭

大海中有翠藍山山有三四高大者曰梭篤蠻自帽

山東南乘東北風三日方至人皆穴居不問男女俱裸若野獸然無稻而食芋芭蕉子波羅蜜之類或魚蝦布略蔽身必生爛瘡昔佛度海至此解衣而浴土人竊之佛呪而然蓋附會語也俗云赤卵塢此地是已又西海行七八日見鶯哥紫山又三二日至佛堂山始爲錫蘭國泊舟曰剛羅里濱海山麓磐石隱然足跡尚存長可二尺傳云佛足至此也其跡有泉不涸人蘸之拭面目曰佛清淨蓋民俗之謬也寺有卧佛榻沉香爲之飾以八寶華麗鮮侔佛牙舍利子俱

存于寺所謂涅槃其地是已又西北陸行五十里始至王居王鎔里人也尚釋重象牛煨牛糞灰遍體塗之牛則飲其乳而不食其肉死瘞之有殺者死刑或贖以牛頭金王宮民居且必調牛糞塗地而禮佛王都大山侵雲石有巨跡深二尺長餘八尺傳云祖阿瞿生人足跡卽盤古也地廣人稠亞于爪哇國富饒民上裸下帷加以壓腰鬚毫皆剃留髮首布纏之遭父喪則鬚毫不剃女椎髻于後下亦縈白布隱潛飲食不令人見也膳必酥乳檳榔不絕口死者火之而

葬其骨厥產鴉忽有青紅黃三色青朱藍不昔剝泥
窟沒藍石二種出于沙中山被水衝流下則有之海
洲日映光浮乃蚌珠氣也爲池間二三年冥蚌于池
有司守之珠可淘取有稻芝蔴菜豆無麥多椰子果
有芭蕉子波羅蜜甘蔗瓜蔬牛羊鷄鴨亦有市用金
錢重一分六釐重中國麝香綺縠絲絹青磁器銅錢
樟腦厥貢珠寶石

小葛蘭

東連大山餘方皆瀕海王乃鑽里人也尚浮屠尊重

象牛婚喪服用與錫蘭同自錫蘭國別那里西北海行六晝夜始至日食多酥用以和飯市用金錢重二分境土乃小國也

阿枝

東連大山餘方皆瀕海自葛蘭國海行船山西北一晝夜乃至其國王亦鎖里人首纏黃白布上無衣下縈絲帨加以絲段一疋繫之曰壓腰臣民服用稍與王同屋用椰木及葉緝縱當瓦如苫葢然家造庫藏寶以避火盜人有五等南昆輩與王同類祝髮懸脰

以線乃貴族一等也回回入二等也富有財者曰哲
地三等也牙驗曰革全四等也卑賤者曰木瓜五等
也木瓜業漁樵習服荷禁不許服長衣濱海居居
僅三尺違者罪之上衣不過膝途過南毘哲地卽伏
而候過乃起王尚浮屠尊敬象牛建寺範金爲佛青
石結座環以溝水旁穿井每旦鳴鐘鼓汲泉灌佛頂
數回已乃禮之有曰濁肌者蓋優婆夷之類亦娶妻
目胎髮不剃不飾以酥按辮或十縷或七八縷垂于
後牛糞灰塗體不衣而藤束腰白綠四手持大螺常

吹而行其妻祇以小布蔽羞隨夫歷人家覓錢粟氣
候熱如夏無霜雪春雨卽葺舍儲具逮夏連雨市陌
成河北屋不能出入至七月始霽八月望後始晴至
冬猶然三月又雨諺云半年有雨半年晴者是已市
用金銀錢金錢九成色曰法南計一分一釐銀錢僅
如螺屑曰芥兒計四釐每十五當金錢之一婚喪各
以類不等厥產胡椒往往種于圃四百斤直金錢百
文銀直五兩珠以分論有米粟麻豆麥稷無麥有象
馬牛羊犬貓鷄無騾馬暨鵝

古俚

西洋大國也西瀕海南距柯支國北距狼加國海
近山遠東七百里許距坎巴夷自柯支海行可三日
至距中國十萬餘里永樂五年

上命太監鄭和等賜王以誥命陞賞其將領有差皆
冠帶勒石美之王尚浮屠敬象牛人有五等一回回
一南毘一哲地一韋全一木瓜王南毘人不食牛肉
將領回回人不食猪肉昔王與回回誓互相禁食銅
範佛像曰納兒佛殿以銅瓦座傍穿井汲泉浴佛而

禮之取牛糞調水塗地及壁臣民大家晨起亦用牛糞塗地煨牛糞灰囊于身每旦水調灰抹額及股謂敬佛也傳云昔有聖人曰某些行教化人人俱服從某些遠適遣弟曰撒沒黎主之弟乃縱誕歸金犢以諭國人曰此乃聖主敬之有驗人罔不從命牛日糞金人獲其利遂信之不疑某些歸恚其弟誣惑遂毀牛弟恐于是跨象而遁國人猶望其還故敬象牛者以此國事皆決于二將領乃回回人也國人半崇回回教禮拜寺有二三十餘七日一禮至日齊沐謝事

午時男女拜天子寺未刻乃散始治他事俗尚信義
中國舶貨至皆二將領主之遣馴僧議直言定再不
易其算法祇憑手指屈伸分毫不謬市用六成金錢
曰吧南重二分文二面小銀錢曰搭兒重三釐秤曰
法利二十兩爲斤當中國一斤九兩六錢并曰党戛
黎當中國一升六合樂則葫蘆爲樂器紅銅絲爲絃
歌樂自和協鏗鏘可聽婚喪禮各以類王老則不傳
子而傳外甥無姊妹子則傳弟無弟則傳子有德者
古今皆然刑無鞭笞輕則斷手足重則罰金誅戮甚

則沒家夷族有罪繫之輒承服不承服則寘其手指于沸油中半饌三日後驗之爛者伏辜全者免罪免罪者將領導以鼓樂還家親戚致賀飲酒西洋布曰檣黎出于鄰邦坎巴夷之屬每疋闊四尺五寸長二丈五尺直金錢八文有色絲間花幌闊五尺長一丈三二尺直金錢百文厥產胡椒亦以圃種十月熟富家則多植椰子樹千株至二三千者有之嫩者有漿可釀酒老者可作油糖或飯殼可作杯煨枝灰可廂金枝幹可構室葉可葢屋蔬有薑芥蘿蔔胡荽葱蒜

胡蘆茄瓜東瓜四時有小瓜如指長一寸許味美果
有芭蕉子波羅蜜木鱉子樹高十餘丈綠叢如柿三
四十有米無麥有鷄鴨無鵝羊高如騾灰色水牛不
大黃牛則大有至三四百斤者不食其肉取其乳酥
啖飲不絕口牛死則埋之畜有孔雀烏鴉鷹鷺無餘
鳥厥貢金絲寶帶金絲如髮結花綴八寶珍珠

溜山牒幹

四百濱海僅如洲渚小國也曰牒幹無城郭依山聚
居西距海中有石門如城關有八大地皆以溜名亦

通舟楫餘小溜無慮三千數所謂弱水三千者是已
人皆巢居穴處不識菽粟而啖魚蝦無衣祇以葉蔽
前後陰舟行遇風一失入溜則水弱而沒溺故舟人
謹防之牒幹國皆回回風俗淳厚動遵教門業漁好
種椰樹男膚微黑白纏首下縈帨婦人短衫下亦縈
帨大帨蔽面目婚喪禮遵教門行氣候常熱如夏土
瘠米少無麥市用銀錢厥產降真香柳皮結繩可貫
板成舟澀青塗之堅如鐵丁龍涎香然之香清直與
銀同海貳采而鬻于暹羅葛刺用與錢同鮫魚鬻之

可鬻于鄰國曰溜魚織絲幌甚精緻又織金幌男可
縈首牛羊鷄鴨俱有

祖法兒

國瀕海依山東南皆海西北重山自古徯國西北海
行十晝夜可至無城郭人皆崇回回教體幹修頽語
言朴實王纏首以白細布衣青花細絲幌或織金錦
袍穿靴躡履乘輜轔馬前後象駝馬隊成行共吹簫
築鎖捺民間纏首長衣靴履當禮拜日罷市半日長
幼俱沐浴盛服塗容體或薔薇露或沉水香薰衣及

體又以爐然沉檀香然後行禮禮既乃散香滿街市
半餉乃已婚喪遵回回教氣候常如秋無寒市用金
錢重二錢徑一寸五分文以人形銅錢重四分厥產
乳香乃樹脂也又有血竭蘆薈沒藥安息香蘇合油
木驚子之類以易中國絳絲磁器其米麥豆粟黍稷
麻穀瓜茄牛羊馬騾猶犬鷄鴨俱有山駝鷄匾頸鷄
身如鶴長三四尺脚二指毛如駝行亦如駝故喚駝
鷄蛇有單峯者有雙峯者人以騎坐肉以市鬻厥貢
乳香駝鷄等物

阿丹

國瀕海富饒崇回回教阿刺壁言語性情強梗悍戾
有勝兵七八千馬步俱精鄰邦畏之自古徂因丹西
行一月可至永樂九年詔中使賜命其國王遠迎謹
甚卽諭其國人就至市王頂金冠衣黃袍腰寶銙金
帶屬禮拜日則易白纏頭以金錦爲頂衣白袍乘車
列象而行將領等冠服有差民間男則纏頭衣撒哈
刺錦繡紵絲紉布等服有靴鞋婦人則長衣頂珠冠
纓終耳金廂寶環手金寶鐲釧足指亦有環絲悅金

銀器皿絕勝赤金錢曰哺嚙黎重一錢面有文紅銅錢曰哺嚙廝市易用之氣候溫和曆無閏以月出定月之大小夜見月明日又爲一月也有善推步者定某日春則花木開榮某日秋則花木彫落日月交蝕風雨潮汐無不驗者民居累石爲壁上覆以磚或土高至于四五尺市肆熟食及綺帛書籍俱如中國粒食多用酥糖蜜製味極精美厥產有米麥蔴豆蔬菜果有萬年棗松子杞擔乾葡萄核桃花紅石榴桃杏之類獸有象駝牛羊雞鴨犬貓無猪鵝羊則無角領

垂短毛有紫檀蓋薇露簪菊花白葡萄福鹿青花白
駝鷄福鹿如驪白首白眉滿體細間道青花如畫青
花白駝鷄如福鹿麒麟前足高九尺餘後足六尺餘
項長頭昂至一丈六尺傍耳生二短肉角半尾鹿身
食粟豆餅何獅子形類虎黃黑毛鉅首濶口尾猶黑
其長如縷聲吼如雷百獸見之皆伏厥貢金帛寶帶
珍珠八寶金冠鴉忽等各種寶石地角金葉表文

榜葛刺

地廣人稠財物豐碩自蘇門答剌國海行見山并翠

藍島西北行二十里方至湖地甚更小舟入五百餘里至鎖納兒港舍舟而陸西南行三十五里站至其國有城郭王宮暨大小府寺皆在城乃回回人風俗淳厚男婦皆黑色白者稀男皆祝髮白布纏身圓領長衣仍束絛悅蹕皮履王及將領冠服用回回制甚潔整語言枋葛俚自成一家亦有巴兒西語者市用銀錢曰儻伽重三錢徑寸二分而有文以此權物價重輕亦有海貳曰考黎婚喪皆回回教氣候常熱如夏刑有答杖徒流官有印章行移軍亦結糧管軍者

曰吧斯刺兒陰陽醫士百工技藝皆有衣黑白花衫
索腕以硝子貫珊瑚琥珀曰纓絡爲佩以硝子爲鐲
釧繫臂善歌舞以伯酒筵有曰根肖速魯柰柰者優
人也每五鼓時候于將領及富室門吹鎖捺擊鼓已
乃次第其家作之至晚時詣各家必勞以酒餽錢貨
其餘百戲皆有又以鐵索繫虎行市及人家則解索
坐虎于庭裸而搏虎虎怒交撲仆虎數回乃已或手
投入虎喉虎亦不傷之戲已仍繫之家必啖虎以肉
勞其人以錢蓋虎戲以需財也曆止十二月無閏厥

產紅粟麥芝蔴豆黍稻一年二熟蔬有薑芥葱蒜瓜
茄酒有椰子酒樹子酒茭葦酒以檳榔當茶畜有駝
馬騾水黃牛山緜羊鷄鴨猪鵝犬獐果有芭蕉子波
羅蜜酸石榴蔗糖蜜布有數色華布曰卑泊濶三尺
餘長五丈五七尺細膩如粉牋姜黃布曰滿者提濶
四尺長五丈餘緊密堅實曰沙納巴付濶五尺長三
丈如生羅卽布羅也曰圻白勒搭黎濶三尺長六丈
布眼疎麓卽沙布也以縹頭曰沙塌兒濶二尺五寸
長四丈若三梭曰慕黑慕勒濶四尺長二丈背面皆

氍毹厚可五分卽梵羅錦也氍毹祇織絛嵌悅亦有
綃成錦者布有白者樹皮製成膩滑光潤如鹿皮器
有髹漆杯盤鑲嵌鎗剪

忽魯謨斯

國濱海倚山通諸國貨故國人多殷富無甚窘者有
則衆濟之自古俚國西北海行可二十五日至其國
國崇回回教曰五回禮拜必齋沐誠敬風俗淳厚人
肌膚白皙豐偉衣冠嚴肅婚喪禮遵回回教

海槎餘錄叙

僭耳孤懸海島非宦遊者不能涉涉必有鯨波之險
瘴厲之毒黎獠之冥頑無法爲茲守者多不能久久
亦難其終也余自嘉靖龍飛承乏是郡迄於丁亥廼
有南安之命山川要害土俗民風下至鳥獸虫魚奇
怪之物耳目所及無不記載其幾百餘則藏之篋笥
將謂他日南歸客有詢及茲郡之略卽舉以對旣而
水陸跋涉頗多散失遂至湮滅無遺矣今懸車去郡
倏有數載不敢謂久而能終但郡中事蹟班班尚能

追憶撥拾數事恍然猶在滄溟杳渺之中因懲吹簞
之失用梓以傳名海槎餘錄云

游槎餘錄

吳郡顧玠

載酒堂卽蘇長公寓僦耳遊宴之地也今有堂三楹
祀公像于中元廉訪使伯琦周公隸書牌文一道列
堂東隅書法甚精堂周遭有牆相去百步有塘寬百
畝餘水土深淺異處蒲菰蘆葦之屬最茂密每春秋
二祀例卒郡僚師儒會飲堂中卽漁此塘以爲樂名
濁勞會亦洗闔境諸祀之勞之謂也故傳乳泉井桃
榔菴茉莉軒今皆湮廢遺址尚存

波羅密樹類冬青而黑潤倍之幹至斗大方結實多者十數少者五六顆皆生于根幹之上狀似冬瓜外結厚皮若栗蓬多棘刺方熟時可重五六斤去外殼內肉層疊如橘囊以其甘如密故云

黎俗藏置酒米軋肉衣布之屬不于其家必間一高坡之地離家百步內外以草樹略加繚繞迴護輦置其中名曰殷雖村家叢雜亦不相混間有盜之者每犯微獲法曰遂距痕卽足跡也余初不之信因彼自服而后然之

佛桑花枝葉類江南槿樹花類中州芍藥而輕柔過之開時當二三月之五色婀娜可愛

僭耳境山百倍于田土多石少雖絕頂亦可耕植黎俗四五月晴霽時必集衆斫山木大小相錯更需五七日晷測則縱火自上而下大小燒盡成灰不但根幹無遺土下尺餘亦且熟透矣徐徐鋤轉種綿花又曰貝花又種旱稻曰山禾米粒大而香可食連收三四熟地瘦棄置之另擇地所用前法別治大槩地土產多而稅少無窮之利益在此也

蟒蛇產于山中其皮中州市爲絃樂器之用其膽爲外科治瘡癰之珍藥然亦肝內小者爲佳此地兼產山馬其狀如鹿特大而能作聲尾更板濶與鹿稍異蟒蛇嘗捕吞之從后脚而入雖角實大二倍于鹿毒氣呵及卽時解脫初吞時亦不能轉動略向水次伸舒消盡無餘矣途人卒然相值雖持木棍亦將無施解事者執指大蛇皮水在手一揮卽止可見物貴得其制不在操利器也

榕樹最大其陰最密幹及三人圍抱者則枝上生根

綿綿垂地得土力又生枝如此數四其餘有潤至三四丈者特中通不圓實陰覆重重六月不知暑木理粗惡不堪器用

青橄欖無仁烏橄欖有仁外肉取來杵碎乾放則自有霜堆起如白鹽名曰欖醬二種俱野生當四五月盛時市人儘力取回用支一年不似吾江南之甚珍貴也

黎俗男女週歲卽文其身自云不然則上世祖宗不認其爲子孫也身穿花厚布衣露腿赤足頭戴漆帽

傍贅尺許雉毛二莖披肩領闊可耻也男子家富者
兩耳復贅盡口大銀圈十數爲富侈

花梨木雞翅木土蘓木皆產于黎山中取之必由黎
人外人不識路徑不能尋取黎衆亦不相容耳又產
各種香黎人不解取必外人機警而在內行商久慣
者解取之嘗詢其法於此輩曰常七八月晴霽遍山
尋視見大小木千百皆凋悴其中必有香凝結乘夜
月揚輝探視之則香透林而起用草繫記取之大率
林木凋悴以香氣觸之故耳其香美惡種數甚多一

由原木質理粗細非香自爲之種別也

深黎自婺嶺以北有一種曰遐黎其俗去黎益遠習俗又相違居常以椰瓢蔽體更間習弓矢凡父母過五十懼其老而衰也則烹食之云葬于腹中以爲得所噫天之生人有如此哉

海槎秋晚巡行昌化屬邑俄海洋烟水騰沸競往觀之有二大魚遊戲水面各頭下尾上決起烟波中約長數丈餘離而復合者數四每一跳躍聲震里許余怪而詢于土人曰此番車魚也間歲一至此亦交感

生育之意耳今中州藥肆懸大魚骨如杵曰者乃其脊骨也

海鰐乃水族之極大而變異不測者梧川山界有海灣上下五百里橫截海面且極其深當二月之交海鰐來此生育隱隱輕雲覆其上人咸知其有在也俟風日晴暖則有小海鰐浮水面眼未啓身赤色隨波蕩漾而來土人用舢舨裝載藤絲綵爲臂大者每三人守一莖其杪分贅逆鬚餘頭二三支于其上遡流而往遇則並舉鎗中其身縱綵任其去向稍定時復

似前法施射一二次畢則棹船並岸創置沙灘徐徐收縶此物初生眼合無所見且忍鎗疼輕漾隨波而至漸登淺處潮落閣置沙灘不能動舉家分斮其肉作煎油用亦大矣哉

馬產于海南者極小只可作之驢騾而身稍長耳毛片不殊于中州當少剪鬃時極駿可愛然騎駛則無長力上等價可四兩尋常不出二兩

黎俗二月十月則出獵當其時各尙首會遣一二人赴官告知會但出每數十村會留壯兵一二十輩守

舍男婦齊行有司官兵及商賈並不得入入者爲之
犯禁用大木枷脛及手足置之死而不顧何其愚也
獵時土舍尙首爲主聚會千餘兵携網百數皆帶犬
幾百隻遇一高大山嶺隨遣人周遭伐木開道遇野
獸通行熟路施之以網更叅置弓箭熟閑之人與犬
共守之擺列旣成人犬齊奮叫鬧山谷應聲獸驚怖
向深嶺藏伏俟其定時持鐵砲一二百犬幾百隻密
向大嶺舉砲發喊縱犬搜捕山岳震動獸驚走下山
無不着網中箭肉則歸于衆皮則歸于土官上者爲

麋皮次者爲鹿皮再次爲山馬皮山猪食肉而已文豹則間得之也

新場海三面山環北一面只三四里通大海洋內寬可百里餘分藏新英南灘上下二十四埭漁戶環列居焉每風大時蛋船四百餘隻咸漁其中風靜始出大海可謂坐享無窮之利也

海南地多煥少寒木葉冬夏常青然凋謝則寓于四時不似中州之有秋冬也天時亦然四時晴冽則穿單衣陰晦則急添單衣幾層諺曰四時皆是夏一雨

便成秋又曰急脫急着勝如服藥

相思子生于海中如螺之狀而中實若石焉大比豈粒好事者藏置篋笥積歲不壞亦不轉動若置醋一盂試投其中遂移動盤旋不已亦一奇物也

檳榔產于海南惟萬崖瓊山會同樂會諸州縣爲多他處則少每親朋會合互相擎送以爲禮至于議姻不用年帖只送檳榔而已久之多以家事消長之故改易告爭官司難于斷理以無憑執耳愚民不足論士人家亦多有溺是俗者

鸚鵡杯卽海螺產于文昌海面頭淡青色身白色周遭間赤色數稜好事者用金庑飾凡頭脰足翅俱簡置之几案亦異常耳

海南之田凡三等有沿山而更得泉水曰泉源田有靠江而以竹桶裝成天車不用人力日夜自車水灌田者曰近江田此二等爲上栽稻二熟又一等不得泉不靠江旱澇隨時曰遠江田止種一熟爲下等其境大繁土山多平坡一望無際咸不科稅雜植山菓綿花護利甚廣誠樂土也但其俗好鬭健訟不容人

耕耳

石蠃生于崖之榆林港港內半里許土極細膩最寒但蠃入則不能運動片時成石矣人獲之則曰石蠃相傳置之几案能明目

勞將軍廟去城東隅六十里許祀屋久廢只隙地在焉凡新官到任必先此設祭祀典不載其名爵父老相傳云此神乃馬伏波部下先鋒將方凱旋時牽馬飲于河馬忽覩水中影雙蹄奮起傷其陰而死遂爲神余任時彼中似例祀祀畢父老喜告曰任內當大

吉未逾年新守至亦似例祀衆咸驚報曰祀器無故
自裂于案任內當不吉后歲餘守卒此神亦靈驗矣
茨竹大如指長逾二丈節節生枝文采士人家用植
于居之周遭以代垣墻雖雞犬不能踰越陰森柔嫩
綠潤如沃可愛也

江魚狀如淞江之鱸身赤色亦間有白色者產于鹹
淡水交會之中士人家以其肉細膩初爲膾烹之及
有味皮厚如錢此品不但勝絕海鄉雖江左時魚鱸
鱖之味亦無以尚也

玳瑁產于海洋深處其大者不可得小者時時有之
其地新官到任漁人必携一二來獻皆小者耳此物
狀如龜鼈背負十二葉有文藻卽玳瑁也取用時必
倒懸其身用器盛滾醋潑下遂片應手而下但不老
大則其皮薄不堪用耳

酸笋大如臂摘至用沸湯泡出苦水投冷井水中浸
二三日取出縷如絲醋煮可食好事者携入中州成
罕物京師勳戚家會酸笋湯卽此品也

梳榔木類紆標樹樹杪挺出數枝每枝必贅青珠數

條每條不下百餘夥計一樹可得青珠百餘條團團懸掛若傘蓋然可愛也其木最重番船用爲鎗以代鐵其鍾重鋒鏑侔于鐵也色類花梨而多綜紋

土菓曰陽桃大如拳綠色明潤五稜並起劍脊中核如花紅子味帶酸宜於酒後咀嚼之俗多用晒乾作添案菓用

儋耳與瓊崖萬三處鼎峙爲郡因叅以十縣十一守禦所其地孤懸海島平曠可耕之地多在周遭深入則山愈廣厚黎婺嶺居其中以爲鎮自漢武迄今幾

千年外華內夷卒不可變者以創置州衛縣所必因平原廣陌故周遭近治之民漸被日深風移俗易然其中高山大嶺千層萬疊可耕之土少黎人散則不多聚則不少且水土極惡外人輕入便染瘴癘卽其地險惡之勢以長黎人奔竄逃匿之習兵吏烏能制之此外華內夷之判隔非人自爲之地勢使之然也荔枝凡幾種產于瓊山徐聞者有曰進奉子核小而肉厚味甚嘉士人摘食必以淡鹽湯浸一宿則脂不粘手野生及他種味帶酸且核大而肉薄稍不及也

慈村貿易處近城則曰市場在鄉曰墟場又曰集場
每三日早晚二次會集物貨四境婦女擔負接踵于
路男子則不出也其地殷實之家畜妻多至四五輩
每日與物本令出門貿易俟回收息或五分三分不
等獲利多者爲好妾異待之此黎僚風俗之難變也
芭蕉常年開花結實有二種一曰板蕉大而味淡一
曰佛手蕉小而甜俗呼爲蕉子作常品不似吾江南
茂而不花花而不實也

椰子樹初栽時用鹽一二斗先置根下則易發其俗

家之周遭必植之木榦最長至斗大方結實當摘食時在五六月之交去外皮則殼實圓而黑潤肉至白亦至清且甜飲之可祛暑氣今行商懸帶柳瓢是其殼也又有一種小者端圓堪作酒盞出千文昌愛山之境他處則無也

凡深黎村男女衆多必伐長木兩頭搭屋各數間上覆以草中剖竹下橫上直平鋪如樓板其下則虛焉登陟必用梯其俗呼曰攔房遇晚村中幼男女盡驅而上聽其自相諧偶其婚姻仍用講求不以此也

文昌海面當五月有失風飄至船隻不知何國人內
載有金絲鸚鵡墨女金條等件地方分金坑女止將
鸚鵡送縣申呈鎮巡衙門公文駁行鎮守府仍差人
督責原地方畏避相率欲飄海主其事者莫之爲謀
余適抵郡咸來問計余隨請原文讀之將飄來船作
覆來船改申一寨而止衆咸稱快

黎人善射好鬪積世之讐必報每會聚親朋各席地
而坐飲酣顧梁上弓矢遂奮報讐之志而衆論稱焉
其弓矢蓋其祖先有幾次鬪敗之恥則尅箭幾次射

于梁上以記之故云飲醉鼓衆復飲相與呌號作狗
吠聲輒二三晝夜自云係狗種欲使祖先知而庇之
也以次則宰羊鬻肉祿散就近村落無不踴躍接受
尅日起兵讐家聞之亦如此間法募兵應敵臨陣遇
有州縣公差人役樂請觀戰兩家婦女亦各集本營
當退食之際婦女爭出營認箭雨不拘忌其俗云男
子臂只結于男子面上若及婦女則于其父母家更
添讐怨矣其勝敗追奔亦各有程度不少踰之數中
惟鋒鏑死者密以瘞之父母妻諱不悲泣恐敵人知

爲其不武也

翡翠生于深黎之茂林峻嶺人罕得見傳云晴霽日
中始一出陰晦竟日不出小大僅侔梁燕羽翰五色
離披可愛人必積久探視羅其巢始獲之也

儋耳孤懸海島厯書家不能備其黎村各一老習知
節候與吉凶避忌之略與厯不爽毫髮大率以六十
年已往之跡徵驗將來固亦有機巧不能測處嘗取
其本熟視字畫訛謬不可識詢其名則曰厯底記
儋耳七坊黎崗山水險惡其俗間習弓矢好戰鬪中

多可耕之地額糧八百餘石弘治末困于徵求土官符蚺蛇者扇動諸黎遠邇響應得萬兵餘攻城略地一方罹患鎮巡二司調動漢達官軍二萬員名會臨本境分作五道搗其巢第一道首臨落窪境黎首符那南率輕兵據險迎敵官兵死者三千餘而分守重臣亦與難焉其四道聞風潰回此蓋輕率無紀律故耳勢日益猖獗縱橫四出無忌繼而請于朝命將益兵前部方入臨高縣境賊衆適至官兵中道截出一戰勝捷偏帥亦中流矢卒蚺蛇恃勇輕出逼奪民

女爲妾飲酒留連官軍踵其跡輕騎赴之謀渡水脫走誤投深澗騎爭逐之中箭死餘黨招撫訖嘉靖初符蚺蛇從姪符崇仁符文龍爭立起兵讐殺因而扇動諸黎陰助作逆余適拜官蒞其境士民咸憂危蹙額道其故余荅曰可徐撫之未幾崇仁文龍弟男相繼率所部來見勞遣之余知二酋已獲繫獄故發問曰崇仁文龍何不親至衆戚然曰上司收獄正嚴余荅曰小事行將保回安生衆欣然感謝郡士民聞之駭然曰此輩寬假卽魚肉我民矣余不荅旣而閱獄

縱繫囚一百人州人咸賞我寬大之度彼黎衆見之
盡闔首祝天曰我輩冤業當散矣余隨查該崗糧俱
無追納示喻黎老各出長計轉請海道明示黎衆爭
相告乞辜保其主余諭之曰事當徐徐此番先保各
從完糧次保其主何如衆曰諾已而得請從黎俱縱
回前此土官每石糧徵銀八九錢余欲收其心先申
達上司將該崗黎糧品搭見徵無徵均照京價二錢
五分徵收示各黎俱親身赴納因其來歸人人撫諭
藉其名氏編置十甲辦糧除排年外每排另立知數

協辦小甲各二名又總置總甲黎老各二名共有百
餘人則掌兵頭日各有所事樂于自專不顧其主矣
日久寢向有司余密察識其情却將諸首惡五十餘
名解至省獄二千里外相繼牢死大患潛消后落窠
尚黎聞風向化亦告編版藉糧差訖州倉積存聽征
糧斛准作本州官軍俵糧敷散地方平妥余后復從
事廣西竟有加俸二級恩命檄未下而已轉官南安
矣千里石塘在崖州海面之七百里外相傳此石比
海水特下八九尺海船必遠避而行一墜卽不能出

矣萬里長堤出其南波流甚急舟入廻溜中未有能
脫者舟船久慣自能避雖風汛亦無虞又有鬼哭灘
極怪異舟至則波頭隻手獨足短禿鬼百十爭互爲
羣來趕舟人以米飯頻頻投之卽止未聞有害人者

吳中勝記

明 華鏞

職方氏曰士者首叙東南揚州之域其澤藪曰具區
具區卽太湖太湖環吳諸山而控之諸山以湖而益
勝一山一勝勝勝相形而勝遂表於東南矣鵝湖去
山百里而近予歸鵝湖之五年乙未八月丙申邀聽
天山人載酒泛月湖上戊戌抵吳之行春橋橋九虹
蜿蜒百步東引越城橋西跨橫山之麓南逼石湖烟
霏翠靄流動恍惚卽此便非塵境矣橋右有亭亭右

有石湖書院宋參政范文穆公成大之歸隱也書院
有文穆田園雜興六十首翰墨流麗風裁可想湖方
數里深不盈仞一水北自橫塘達湖之南直抵太湖
曰越來溪乃勾踐鑿以進兵伐吳者又築城通之是
謂越城橫山四而皆橫多塢書院乃其東麓麓形如
磨曰茶磨嶼下有接待寺右有坎僅架石梁頂生叢
竹天光如鏡曰補陀巖巖之南塢有治平寺寺之南
崛起如甃蓋郊臺也吳俗王而郊故名又南稍折而
西曰楞伽山有上方寺寺有塔塔下有雙泠泉楞伽

東南曰褒忠嶺褒忠西塢特起而南曰吳山嶺嶺腰
有寺寺有井僧言鑿石得之宋時龜蛇怪見寺以井
勝病者汲之多愈故名分水嶺又曰施水院一碑篆
龜蛇記甚古記多與僧言合嶺之南曰大尖墩登而
望之左田萬頃石湖平窪如掌僧指旁曲稍遠者爲
百花洲田以東平漠無際一突遠見爲崑山迤北青
烟如抹虞錫諸山也右邇太湖崇巒層擁僧指遠者
爲堯峯此去二十里予卽命輿而往過嶺三皆窄峻
不暇指問及抵堯峯回顧不知所從來矣堯峯有寺

寺有吳文定公匏庵之像王文恪公守溪碑徐中丞
仲山墓藏記楊儀部南峯所作僧疏予讀之始知有
所謂橫山十景今多廢滅景有龍潭曰碧玉沼多產
異龜有寶雲井圓逕丈許記云大旱不竭旬雨則雲
霧冥濛數里其中白光一渺蓋龍噓氣也至是則吳
興雲間諸山隱隱四出南望湖中洞庭東西兩山如
帶而近轉顧則獅山入抱而兩阜如毬此外予所欲
遊者一覽具得其槩北登妙高峯直一突耳並北一
墩如之橫山之嶺凡十數嶺各有墩墩如之僧云中

空相傳古藏軍處豈所謂越城荒壘者歟下指多景
巖葱然別塢薄暮不可去乃東向白龍洞山西雲氣
微黑僧云龍作雨矣風逆不吾及也尋雨數點而止
洞口巨石如屏步底有聲僧云其深莫測近塞之洞
左攀磴抵觀音巖又一景矣凡此諸峯堯峯獨勝望
獨遠堯峯者文恪云或傳堯時有人避水洪荒之世
欲免懷襄之害理或然也南峯云此峯最高故名堯
也按堯字從幸在兀上南峯近之

巳亥放舟木瀆縱步靈巖之陽遙見塔影上下怪石

叢立有塊然突者有若倚者望者蹲者偃者銳者斲
絕者不可名狀者而白路起伏如蛇行達其頂頂則
窪然小也其下一溪達太湖則如矢之疾而直也予
呼僧道之三里抵韓蘄王墓墓旁立甃數仞石如之
御書中興定國佐命元勲之碑其大勒忠武而松莽
鬱翠者王之墓也僧曰此山乃吳王與西施遊地卽
館娃宮也怪石故有異名倚者醉羅漢也望者延勁
龜也蹲者駝也偃者飛來石也銳者圓照塔也軒絕
者佛目巖也塊然突者西施洞也白路以下響屨廊

也起伏如蛇百步街也直達如矢採香徑也墜然小
者琴臺也臺下有坎澆花池也有圓井吳王井也有
八角井智積菩薩所鑿也僧復道之三里抵洞洞當
湖口湖口兩山如頤而張太湖吞吐其中湖口之外
隱焉來者洞庭東山也馴歷諸石名象寔肖佛日巖
字大遲三尺懸勒萬仞殘爍斷碑猶見勅字又見魯
國公天官太宰中大夫三行背宋刻道異可玩響屨
諸說蓋無所稽矣夫西施者苧蘿山鬻薪之女越王
使善相者得之飾以羅縠教以容步習於土城臨於

都巷三年學服而獻於吳吳以亡國如僧所云固其遺臭也又上百磴宛存二井逕各丈有三尺圓者綠萍成蓋清瑩見底角者濁不生萍人多汲之小憩數酌尋登琴臺琴臺叢石平中者也二字古刻深入顯照天日文恪嘗于上下各書吳中勝蹟字表陷異刻苔蘚且蝕矣興行山陰五里道出井井亭亭刻匝涯少師記白巖太宰諸詩皆翰學衡山筆也值井有徑達白樓東閣之先壘壘勢藏密青囊經所謂乘生氣者於是乎在又三里登支硎山一名觀音山山四峯

南峯之南高樹深隱者儀部書院也其號南峯以此
峯半有寺新塑觀音像其宏麗從所未觀觀音後石
室故有石觀音暗中星星者石色也山之名觀音以
此西邈寒泉泉注平石刻寒泉字運丈旁有紫霞道
人虞字至是天平在望層峯接引陟峻之中石砌坦
坦左瞰綠疇搖落萬頃遠岫三四如畫懸堂中右倚
陡峻變態無盡高見無量壽佛字餘隱隱見佛字忽
夾石嶄削而立僧曰此石門也至是奇麗益闕松益
茂門徑益深右謁忠烈廟蓋范文正公先世葬地也

祠及四代尊爲太師與山同久詎偶然哉廟後天平
如錦屏入座其峯皆立僧曰此萬笏朝天也登麓麓
磴如綬欲墜躋百丈見懸壁刻白雲泉字乳泉一脉
深注幽亭又百丈見劒石刻龍門字危險莫加焉予
仰諸顛纔什二耳又百丈見墜石籠下而若留焉又
上或止之曰我昔到此見骨聞微乃止僧曰從迷迷
嶺可到其顛顛平數十畝可坐千人是謂天平又歷
指高峯曰此雲谷石也此穿山洞也此飛來峯卓筆
峯筆架峯小石屋大石室也又曰顛有池甚旱不竭

池有魚魚安從生又曰顛峯有石兀立曰五丈峯又有巨石面圓坎如鏡當坎望之全湖在目是謂照湖鏡予笑曰予旣聞而知之矣他日挾虎備寬時日猶可到也僧曰秦臺猶可到也予曰秦臺何在曰在右右之峻焉莫登路何在曰在右右之尚遠乃返又明日從鄧尉得文恪詩誦者三慕者三詩曰城西諸峯吾所嘉就中尤愛天平勝亭亭一蓋倚蒼冥儼若端人人自敬獅山奔伏象山廻支硎秦臺皆退聽橫山當面橫作屏背擁蓮花互相映林林萬石相拄撐倚

插半天峴不定蹲如虎豹奮攫噬蹇如鵬鯨恣豪橫
勇如武士力錫屈秀如處女色媚靚我來敬拜太師
墳松柏陰森趨一徑忽瞻萬笏森向天直氣噴薄凜
猶勁乃思范公立朝時正色危言挂邪佞茲山固合
生茲人松嶽降賢尼孕聖吳山第一稱天平宋家第
一稱文正

庚子山人疾作謂予曰穹窿吾登再矣吾僕固能近
也僕道從側麓側麓童然草不盈尺窮無人蹤飛鳥
不過予竊怪之卽下從廣道以返但見諸麓迴匝風

氣藏頓疑有吉焉又覺有異香微襲與他山異問諸
僕僕曰異香微襲與他山異也因思越絕書云由鍾
穹窿山者古赤松子所取赤石脂也在古已然此其
徵歟抵舟則山人之疾且瘳矣遂並輿而登華山華
山卽天池天池在青松綠樹中夷礪廣道連陰以到
前太守胡可泉題其門曰中吳第一峯門以後鑊峯
成室連琢石佛楹牖有至正年字妙奪天巧其碧水
一澄紅蓮青荷浮映水面者天池也華山疑以蓮華
得名卽文恪所謂背擁蓮華也翼路循池而上池上

已爲人壅矣上鍍天池字甚大睇視之隱有天池舊
字嘉定年書蓋勝蹟之遺自不可滅也又石室立佛
如前者二子乃褰衣直攀其顛顧視久之怪峯競秀
莫可指狀其右際兩石夾立上闕左則上闕而嵯左
後兀然如坐意必有品之者問諸僧僧不應乃下觀
石門石殿石筍皆刻至正年字一石平廣而中坎圓
澤僧曰此鉢盂泉也予笑曰僧乎告其細而忽其大
也何爲天平之名聞而未歷天池之勝覽而無名二
者將孰多乎尋遇諸樵樵曰上闕名天門兀坐名孩

兒石予笑曰怪哉僧也山其有乎物之有主者非夫人所可有也然則夫人若予焉覽勝而來得勝而去何莫非僧有也

辛丑登玄墓山玄墓古鄧尉也楊梅梅樹茶樸蓊鬱數里入山則亭亭數松圍竟丈高四之間有最高者僧宿其枝今與僧俱灰矣僧寶峯請見引至祖僧萬峯之坎吳陽左亘竺山右垂太湖圓當其抱而法華一橫浮動水面雲影流行程南雲篆題天開圖盡得其景矣及登佛殿景如坎而中井亦如之井畔羣竹

良久時霽日當午而寒生足底如零露逼人襟袵欲濕寶峯曰萬峯關山凡十有八而得鄧尉改名登蔚自名時蔚得登蔚之勝者三葬坎佛殿中井也而茲山之勝於是焉窮洪武初詔致天下高僧萬峯不往必致之乃坐逝因出其衣鉢及畫像自題偈曰這箇瞎頭陀看伊直甚麼自如啞盲聾勘破佛祖過不是心不是佛不是物是箇甚麼因呵呵迸出眼光天雷大默覺人皆仁現成笑道修行求佛做因幻書形有相身無生無幻本來真靈源寂默無能覩書相傳

留轉法輪子令寶峯讀之因思異端之害佛爲尤甚
爲其近似而大亂真也斯偈見之矣雖然萬峯知山
得勝坐歸寂滅度幾所謂蛻殼解者雖謂之高僧也
亦宜下歷禪堂羅數衆誦佛經籤帙滿座牙錦爛然
一五臺山僧主之數衆皆其所給夫五臺遠在萬里
而來玄墓之深羅僧誦經良亦苦矣彼惑人者必近
村市以爲之招茲惑者也而差異於惑人者也其謂
之僧也亦宜晚坐虎山橋橋如行春而勝湖水左右
縈繞而不見湖面周水皆田田外皆山涵虛萬頃烟

光四障前塔一雉秀出林表中埠三兩如漚而橋實
聯之中橋而坐但見簫鼓歸舟駛水如箭未幾行吟
繼之于偕山人避之橋北清響隔橋如在天外月光
寢明浸我座中賦詩盡興而返

壬寅探銅井銅井去光福數里越嶺乃至一得有水
尺許銅青點點淨石者是也三面皆湖環疊數嶺嶺
各樹果畝直一金其人朴而訥蓋別一山林矣返光
福寺寺殿唐宇獨存而結構迥異碑多唐僧書書皆
善有唐進士顧士彥者題石剝落而予昂復書之題

日蒼島孤生白浪中倚天高塔勢翻空烟凝遠岫列
寒翠霜染疏林墮碎紅汀沼或棲彭澤鴈樓臺深貯
洞庭風六時金磬落何處偏傍葦蘆驚釣翁字句交
輝常爲光福二絕僧言士容葬宇下施地爲寺五子
官皆太守寺左祠之號爲五神而禱祈不絕近山今
有顧氏二百餘家某年澗底露銅觀音雪有異靈而
寺以起元至十僧今市皆其舍也故傳銅鐘千斤其
靈亦異國初籍寺產歸之民寺以二異得免于觀士
容詩蓋唐以前塔寺備矣及歷宇有空聲莫得其自

塔左一坎朱人題石曰墨沼蓋士容讀書處也沼畔
子昂題石曰觀音泉在寺之後寺之最後卽虎山橋
橋北一埠偃而復起有東嶽行宮子昂題曰天齊仁
智帝殿予平古以還復坐諸橋引僧而問之光福寺
前乃鄧尉之後前逼而高者百步嶺也左疊則穹窿
堯峯華山天平支硎靈巖多昨所遊也右疊則竺山
騎龍西磧鋤井或所未至也右以北則安山安泉割
沙酋里諸山左以北則遮山青山節然無際者陽山
也光福隱然中處以山則遠而近也以湖則近而遠

也以流峙則散而合亂而整蓋湖山之束也果如僧
言者士容者葬垂千禩陰有專壤亦有而不私之道
歟語有之知者樂水仁者樂山彼樂焉如士容是或
一道也

於乎浮圖踞名會襲有巨觀開闢以來山川秀麗自
然之輝如在驅御垢也久矣茲燬者什七八卽有寺
多無僧有僧多田而役蔑有所謂梵唄羌吟以潤飾
其教者予探古懷賢猶耿耿焉而茲其暢矣况乎晴
明見遠秋中見月西成在望而樵牧之歌互上下融

融乎天人之際也予嘗聞太湖三萬六千頃環帶三
郡有七十二峯美哉區也乃以敝舟疲從日循湖之
濱焉而不敢入合諸天平穹窿而慎已恤下之道於
是乎在詩不云乎好樂無荒良士翟翟陶唐氏之遺
風也

泉南雜志

攜李陳懋仁

泉州有浯江郡志云晉南渡時衣冠士族避地於此故又名晉江

萬安橋乃宋蔡忠惠公所造世謂洛陽橋是也落成公自爲記曰泉州萬安渡石橋始造於皇祐五年四月庚寅以嘉祐四年十二月辛未訖功案址於淵隴水爲四十七道梁空以行其長三千六百尺廣丈有五尺翼以扶欄如其長之數而兩之廉金錢一千四

百萬諸施者渡實支海去舟而徒易危以安民莫不利職其事者盧錫王寔許忠浮圓義波宗善等十有五人既成太守莆陽蔡襄爲之合樂讌飲而樂之明年秋蒙召還京道繇是出因記所作勒於岸左公自書大方八分勒二石今在公祠蓋公之功在百世大矣而記僅一百五十三言可見古人不肯擅美如此又問之父老云先時二石爲倭載去後見江間發光採之得後一石其前一石乃後人復模故前石不如後石之瑩潤打碑聲時與江濤競響也俗傳公造此

橋限以濤勢不能案址乃檄江神得一醋字公云廿一日酉時爲之今公記中無是說也王遵嚴曰豈其駕長江之洪流馮虛以構實其役有足駭人者昧者驚焉而言之異亦以賢者之所爲興事起利人樂其成而賴其功故托於神以美之耶又朱驛太初謂前記多三字至今傳其言也

盤光橋自洛陽橋東接鳳嶼嶼在江中央上多腴田稠民居舊有石路潮落路出行者病之朱實祐中僉道詢募貲作石橋長四百餘丈廣一丈六尺比蔡端

明所造洛陽橋長多四百餘尺闊多一尺世知洛陽而不知盤光者蓋以人重也

淳化閣帖十卷宋季南狩遺於泉州已而石刻湮地中久之時出光怪樵馬驚怖發之卽是帖也故泉人各其帖曰馬蹄真跡

衛西榕樹幹大如一間屋枝上有纏纏垂下者謂是根也其高參天枝葉蔭可三十餘丈相傳韓少卿國華爲郡誕魏公日樹杪爲吐烟霞又云榕樹千年者其上生伽楠香

德化縣白堊卽今市中博山佛像之類是也其坏土
產程寺後山中穴而伐之縷而出之確極細滑淘去
石渣飛澄數過傾石井中以漉其水乃埽埴爲器石
爲洪鈎足推而轉之薄則苦窳厚則綻裂土性然也
初似貴今流播多不甚重矣或謂開窑時其下多藏
白堊恐傷地脉復掩之

閩之遠游近番處有燕名金絲者首尾似燕而甚小
毛如金絲臨卵育子時羣飛近沙沙泥有石處啄蠶
螺食有訥游商聞之士番云蠶螺背上肉有兩肋如

楓蠶絲堅潔而白食之可補虛損已勞瘵故此燕食
之肉化而肪不化并津液嘔出結爲小窩附石上久
之與小雛鼓翼而飛海人依時拾之故曰燕窩也
荔枝才已龍眼始行殼黃瓢白核壯肉薄本草謂之
荔枝奴信然蓋荔枝飽啖之餘不堪咀嚼如膏粱子
居常醜臙一旦家落輔薄糜便不適口

甘蔗幹小而長居民靡以煮糖泛海售商其地爲稻
利薄蔗利厚往往有敗稻田種蔗者故稻米益乏皆
仰給於浙直海販蒞茲土者嘗設法禁之驟似不情

惠後甚溥

清源山茶青翠芳馨超軼天池之上南安縣英山茶
精者可亞虎丘惜所產不若清源之多也閩地氣暖
桃李冬花故茶較吳中差早

紅梅百葉一花三子曰品字梅紫梗疎條非復霜皮
鐵幹可偶

芙蓉有產於山者余厝後手植一枝未半載扶疎出
墻名曰木芙蓉花最繁盛不下數百大如甌其色有
朝紅暮白者此則粉紅一色耳

九節蘭花易植不若吳中所欽靜宇中雖若棋列亦不甚香

余解東所植茉莉其高及檐嘗於暑夜設水榻坐其下清芬郁烈可沾眉髮其地易生如吳中彈棹也總錄曰晉書都人簪奈花卽今末利花也

西施舌狀似蛤而長外色蒼水蚌殼內色如孔翠肉白似乳形酷肖舌潤約大指長及二寸味極解美無可與方舌本有數肉條如鬚然是其飲處

北方謂泥磚曰土坯晉江有介島亦曰土坯綠殼白

尾其旁有毛

章魚清脆頗腴諸肴然其形酷似病瘰小兒臂情所
切不堪寓目

龍虱如牛糞上虫似黑而薄劈殼食之小有風味

鯊魚碧血海中介魚也似蟹足十有二長六七寸漁
者醢其肉居人以其殼作水杓穆天子傳黑羊白血
以蠶況之則亦可信

蝦有長一二尺者名龍蝦肉實有味人家掏空其殼
如船燈挂佛前

鱖魚大如指長二三寸花身紅尾善鬪人家畜之俗呼爲丁斑魚張世南宦遊紀云三山溪中產小魚里中兒鬻之角勝爲博戲信然

牡蠣麗石而生肉各爲房剖房取肉故曰蠣房泉無石灰燒蠣房爲之堅白細膩經久不脫

蚌大而肥鮮美特異海物志名天蠃爾雅名魁陸本草名瓦墼子雜俎云鼎俎之味有蚌蠃

鰓一名石鱗魚紫斑如縐錦生溪澗高潔處其大如雞得亦不易厭俗兼皮食之有見餉者余令人縱之

野中左右瞪眸不轉曰此難得之珍味也

造白沙糖法用耳蔗汁煮黑糖烹煉成白劈噶那攪
之使渣滓上浮按老學庵筆記云聞人茂德言沙糖
中國本無之唐太宗時外國貢至問其使人此何物
云耳蔗汁煎用其法煎成與外國等自此中國方有
沙糖茂德乃宋勅局勘定官余郡人也

蟻有數種能螫人厨中饌案以四木桶盛水灌案腳
於中夏雨夜入卧床雖帷帳周密俱所不免多至一
二升最爲寢食之害蓋蟻爲濕熱相蒸所致故居宇

須疏風放水稍亦可除白蟻尤能運土蝕木令棟易
橈

德化九仙山有瀑布泉自雲際下宋王簿柳驥詩有
天棟一泉聲漱玉地高六月夜凝霜之句

清源山在郡北三里許高數千仞未至絕巘數百武
有泉自石罅流出積於砥石凹處其冽獨勝他泉好
事者攀躋汲之冬夏不減其東有妙覺巖石上刻第
一山是米元章行書

南臺峭拔摩空在清源山之右臺南有砥石

出仁風門半里許爲靈山其上有磐石可坐百餘人
中一圓石下不聯屬勢重萬鈞一夫撼之輒動搖不
止其勢就下若將彈丸走坂然然而百夫撼之雖動
不移也郡守周道光題爲碧玉毯又惠安縣有雲峯
上有大石高廣四丈許又有一石上廣下削高丈餘
架於其上恒有落勢併力推之不動以芥挺之輒動
故名曰危石二石之異若一轍焉

高士峰在南安是唐校書郎秦系隱處有石刻高士
峰三字隸書旁有才翁二字按志謂蕪才翁爲漕使

嘗行部至泉題晉江棲真院壁疑此字乃蕪書也
雄山在南安其上有飛瓦巖相傳昔有僧結庵其上
因山伐木但患山高運瓦之難積瓦山下詭欲作法
飛瓦砌屋不用工師卜日已定遠近觀者數千人僧
僞備人挑瓦上山觀者欲其速於作法爭爲掀運頃
刻都盡僧笑曰吾飛瓦只如是耳或謂之智僧余曰
此詭楚然亦可與語權者

金石峰屬南安上有疊石其赤痕類丹書有石刻金
石峰三字

泉之山莫多於西南高絕者莫僊於船山羣峰列秀
此山獨出於其上勢若一船泉人加以福字故名福
船山

泉郡志云東出海門舟行二日程曰澎湖嶼在巨浸
中環島三十六如排衙然昔人多僑寓其上苦茅爲
廬推年大者爲長不蓄妻女耕漁爲業牧牛羊散食
山谷間各筭耳爲記訟者取決於晉江縣城外貿易
歲數十艘爲泉之外府後屢以倭患墟其地或云抗
于縣官故墟之今鄉落屋址尚存唐施肩吾島行

云星架海邊多鬼市島 居處無鄉里黑皮年少學
採珠手把生犀照鹹水卽其處也今澎湖已設遊兵
汛守焉

泉州市舶稅課云香之所產以占城賓達儂爲上沉
香在三佛齊名藥沉真臘名香沉實則皆不及占城
渤泥有梅花腦金腳腦又有水札腦登流眉有薔薇
水占城賓達儂三佛齊真臘渤泥登流眉皆諸番名
泉之南三十里曰石龜峻壁上有石二丈許形酷似
龜行旅望之遠近無異吾郡宋太守岳公珂所著程

史云余外家居泉之石龜卽其處也

宋進士呂造詩云閩海雲霞遶刺桐往年城郭爲誰
封鷓鴣啼江悲前事豈堪香銷滅舊容刺桐城今泉
州築城時環城皆植刺桐故號桐城

優童嬌起者不吝高價豪奢家換而有之蟬鬢傅粉
且以爲當然皆土腔不曉所謂余常戲譯之而不存
也

南陸志

相臺崔銑

嘉靖己亥後七月望 上晉臣銑爲南京禮部右侍郎俟賀 聖節八月十六日 陞辭十九日出都二十九日至家開書櫥檢舊藁回翔菰竹黃花間仕情泊然十月十二日丙子發程携士樂孫同行官府及親友餞于魏營子汲亦乘馬隨自日病凡五年不出今幸愈汲深以不侍養爲歉予慰遣歸晚宿五龍李西牟別業其地面衛水通舟楫民治塲堆木貯鹽皆

有利牟翁曰予岸上有田河中有船可爲富者相對
一笑縣別丁丑午至濬東大任西枕衛民物繁縟晚
至滑縣城大於濬兩邑地亦沙鹺戊寅至長垣多商
販故富巳卯望過兩堤至儀封河西徙田可種夜飲
張黃門漢卿家庚辰劉中丞大謨召予飲又遇雷戶
部啓東酌數行乘月與中丞黃門步歸寓館邑多貴
官故室多壯固鄉民言有司作大司馬坊川九百金
予歎其妄費辛巳辰刻渡河至野雞岡晚至睢州城
中惟南北一街有屋餘皆積水望之一湖陂也壬午

至寧陵癸未至歸德自鷄岡至此州皆河所沒否則
旱十室九餓人皆菜色甲申至石畱鎮李守備瑯閔
知州村送至此同宿店房寧陵公館廢予宿儒學進
德齋石畱故有驛亦廢乙酉四更行午至會亭驛正
屋亦破見天日晚至永城丙戌大風行四十里至鐵
佛劉氏家止前二十里有善道驛廢夜常有盜予少
年聞雕歸名郡也地宜麥河舟通南貨今過之村屯
寥落或數十里皆荒坡自城外多野水歸德船渡五
里而至門今水涸泥淖歸德雖設守備然法不振欲

備十騎護予行不能辦止有四騎永城令劉瑤言兵
備取民快守歸德舛錯可駭軍官富皆剝之下故桀
鰥不制者寘之餘貧者焉能充役此地北接徐碭南
連亳賴一要會也永城民處厥者官不能令豪家大
樓居高閭垣收壯健爲奴便弓馬喜鬪殺多者百人
名曰家將專匿亡命者官以計擒得之則用其家將
奪於途而去收債急於納稅予意不以大刑破滅十
餘家後患不小積弊二十餘年未有經畧此者丁亥
辰刻至善道民多樓草舍巷陌蕭索出善道東行皆

岡阜登陴下坂四望無人煙故爲盜藪日西至宿州
大郡也秋無禾冬種麥未甲土此州爲南北午衢甚
苦厨傳之供戊子午至大店驛驛之東北有湖廣表
二十里秋水涸店人牧猪食葦茨地粟多者至百口
冬作醯猶江南客佔之晚至固鎮凡千餘家鎮南滄
河通商販俗號馬頭言其聚貨而散之他方也已丑
早渡滄橋大風申刻宿王莊館舍敞陋門無關鑰家
人皆坐至月出遂行庚寅巳刻渡淮至濠梁臨淮令
劉仕達來迎劉以御史言事左遷言數日前盜五十

人劫民劉某家火甲園而攻之得盜三十餘訊之皆河南饑民也則河南之變將作予曰今無一處無患無一法無弊所願賢者在令耐煩爾一事周詳民大利一事草畧民之害無窮令謝教而別過二小阜至紅心寢舍半頽席蔽之而寐辛卯行二十里過黃龍岡午至池河前此淮上鹽徒來據岡週旅劉紫巖司馬奏准於池河設守備武官統軍千五百人盜不復至今武官夏忠貌朴質戎士整飭民頌忠廉潔故能止事出池河十五里過盤山高六七里旋繞而行二

十里山之麓曰大柳驛予履行三十里過閭山碎石
錯落壁立直上二里許而降則坦途也山之頂北巉
石磴而上有關羽廟又上石磴有小閣三間四望羣
山煙靄蒼然頗有興致未刻至滁州癸巳午刻至東
葛驛舍盡頽予在簷下一飯而行過黃灘嶺晚至江
浦大司馬湛公大宗伯熊公遣使來迎十一月甲午
朔渡江已刻至南京卽謁 孝陵三日丙申上任辦
事計程千家八十里至五龍渡衛又四十里至潞二
十五里至滑九十里至長垣過兩大堤路皆邪徑九

十里至儀封三十里至野鷄岡渡黃河又五十里至
睦五十里至寧陵六十里由西門入歸德今門外水
潦而湧出飲馬池入東門乃七十里六十里至石留
五十里至會寧七十里至永城自此而南路多岡陀
或升或降非如中原坦然掌上六十里至百善七十
里至宿六十里至大店六十里至固鎮六十里至王
莊田皆稻畦有陂塘潴水六十里至濠梁渡淮自此
山行六十里至紅心二十五里過黃龍又二十里至
池河三十五里過盤山至大柳六十里過閭山至滁

四十里至東葛六十里至黃堆嶺至江浦渡江二十
里至京

貴陽山泉志

吳興慎蒙

木閣箐山

木閣箐山在宣慰司城西四十里林木蒼蔚水西之境由此而入

養龍坑

養龍坑在長官司兩山之間泓渟潄深靈物藏其下當春初和暢夷人立柳坑畔擇牡馬之貞者繫之已而雲霧晦冥類有物蛇蜒與馬接其產必龍駒本

朝洪武四年爲夏明昇降獻良馬十其一白者乃得之於此首高九尺長丈餘不可控御詔祀馬祖然後敕典牧者囊沙四百斤壓而乘之行苑中久漸馴習後將行夕月之禮於清涼山乘之如躡雲一塵弗驚賜名飛越峯且命繪形藏焉翰林學士宋濂爲之贊

大岩山

大岩山在務州縣東八十里山有一岩深邃可容百餘人時多遊翫於此

蝸溪疊岩

蝸溪疊岩在府西一百二十里峻壁間有一石門泉
從中出歲旱禱之風雨驟作

銅關鐵寨山

銅關鐵寨山在潭溪長官司西南其山高峻上頗平
廣可容千人三面據險惟南可登

銅鼓岩

銅鼓岩在黎平府城東北二十里有洞高大如屋深
遠可三里中有溪水橫流

羅鳳洞

羅國洞在府城東北一十五里洞門寬大傍有石礎如牀可容二百餘人

八部山

八部山在普安州城東三十里諸峰皆石矗然摩空

羅磨塔山

羅磨塔山在州城北一百八十里四面峭壁上有寨惟一徑可達東北瞰盤江

三一溪

三一溪在州治東其源有三一出沙莊一出雲南坡

一出目前山三流合一入于城南

水洞

水洞外狹內廣其巔有通明處其中懸崖怪石狀若人獸清奇可玩

關索嶺

關索嶺在頂營長官司治東勢極高峻周廻百餘里上有關索廟因名

蔡苗山

蔡苗山在新添衛城東北一十里上有泉懸崖飛下

宛如玉虹名曰飛泉

都勻洞

都勻洞在都勻長官司東一十里前門北向高廣俱一丈五尺後門南向高廣四五尺洞中亂石狀如象鼻襟草叢生

白水河

白水河在安莊衛城南三十里懸崖飛瀑直下數十仞爲河湍激若雷平日雲霧塞其下

棲霞山

棲霞山府城東山半有洞曰來仙頗幽勝

南望山

南望山府城北深林大箐嵐氣晝昏人跡罕到

萬勝山

萬勝山在思南府城南四面斗絕紅巾之亂郡人避兵於此

石屏山

石屏山鎮遠府治在其下山顛有石高百丈許端直蒼潤如屏

貴陽山泉志八

鐵溪

鐵溪在府城西產異蟹

甘梗泉

泉在平頭司石崖中一源湧出清濁分流有似涇渭之狀

摩天嶺

在黎平府城東

天生橋

一石跨潭溪廣二丈許長二十餘丈

又

金筑安撫司界石壁千仞環繞如城木徑其下信天
造也

九溪河

衛城東南溪流九曲綠陰夾岸每歲上巳日土人浴
此

旗山

山在衛城東南形勢峻拔

谷峽山

賁陽山泉志八

谷峽山在大平伐司危峰峭壁惟一徑可通爲兩司之界

木稀山

山在衛城東危崖陡峻石磴崎嶇僅容一馬記稱要扼之地

響水河

衛城東懸崖飛瀑數十仞有聲如雷下注成河一碧煎頃

盤江山

山在安南衛城東與安莊衛接界石路屈曲上下峻險

白石崖

衛城西南層崖峭壁幽藤飛瀑夏月過此清寒逼人真物外佳境也

木案山

凱里安撫司城東茂林脩竹青翠如屏嶂

雲南山川志

成都楊慎

玉案山

玉案山在雲南府城西二十五里一名列和蒙山秀麗多泉石有碁盤山北平坡中有三泉如盆池郡人春日遊賞于此山中有玉案蘭若

金馬山

金馬山在東二十五里西到碧鷄山中隔滇池山不甚高而綿亘西南數十里上有長亭下有金馬關

碧鷄山

碧鷄山在西南三十里東瞰滇澤蒼崖萬丈綠水千尋月印澄波雲橫絕頂雲南一佳景也漢宣帝時方士言益州有金馬碧鷄可祭祀而致遣王褒往祀至蜀而卒顏師古謂金形如鷄碧形如馬未知果否

太華山

太華山在碧鷄山西北

軟雲山

軟雲山在嵩盟州東四十里世傳蒙世隆征烏蒙得

四女歸至此山四女遙望故鄉俯仰歎息忽山顛霧
結三峰巒謂三爲軟注爲雲其山皆翠獨峻登眺則
雲南悉在目中又名峻葱山

滇池

滇池在府城南一名昆明池一名滇南澤周廣五百
餘里合龍盤江黃龍溪諸水匯爲此池中產衣鉢蓮
花盤千葉藥分三色下流爲螳螂川中有大小卧納
二山史記滇水源廣末狹有似倒流故曰滇漢武帝
欲伐滇國於長安西南穿昆明池象之以習水戰

瀑布泉

瀑布泉在府城西二十里寶珠寺後崖高十餘丈泉自上注下噴珠濺沐清澈可愛

點蒼山

點蒼山在大理府城西高千餘仞有峰十九蒼翠如玉盤亘三百餘里山頂有高河泉深不可測又有瀑布諸泉流注爲錦浪等十八川蒙氏封爲中嶽

鳳羽山

鳳羽山在浪穹縣西南三十里舊名羅浮山相傳蒙

氏細奴邏與時有鳳翔於此故名鳳羽後鳳死每歲冬衆鳥哀吊其上故又名鳥吊至今土人於鳥來時舉火取之鳥見火輒赴火自死

九曲山

九曲山在洱河東百餘里峰岳攢簇狀如蓮花九盤而上又名九重岩上有石洞人莫能通

西洱海

西洱海在府城東古葉榆河也一名洱海又名西洱河源自鄧川合點蒼山之十八川而匯于此形如人

耳周三百餘里中有羅筌濃禾赤厓三島及四洲九山之勝下流合于樣備江濃禾島形如几案故又名玉案山

判丈山

判丈山在臨安府城南二十里高千餘仞中有三峯削出如筆架昔大理段思平外舅爨判居其上因名有祠在焉

碧玉峯

碧玉峯在寧州北五十里巖石磷磷下瞰撫仙湖波

光涵浸如碧玉上有碧王神祠傍有石如懸鍾又名石鍾巖

玉壁山

玉壁山在定遠縣東六十里亭可千仞望之色如玉壁其東有鳳羽山南有易者山北有絕頂峯皆丹崖壁立高出群山之表

雪山

雪山在麗江府西北二十餘里一名玉龍山條岡百里巋巍十峯上插雲漢下臨麗水山顛積雪經春不

消巖崖澗谷清泉飛流蒙氏異牟尋封爲北嶽

九隆山

九隆山在司城南七里山有九嶺又名九坡嶺沙河
源出於此相傳昔有一婦名沙壺浣絮水中觸沉木
有感因孕產九男後沉木化爲龍衆子驚走惟季子
背龍而坐龍因屈其背變語謂背爲九謂坐爲隆故
名九隆長而歸遂推爲酋長山下又有一夫婦生九
女九隆兄弟娶之種類遂蕃皆刻畫其身象龍文於
衣皆着尾世居此山之下諸葛亮南征時鑿斷山脈

以泄其氣有跡存焉

哀牢山

哀牢山在司城東二十里本名安樂夷語訛爲哀牢
絕頂有一石如人坐懷中有二穴名天井土人於春
首視水之盈涸以卜歲之豐凶至者見水溢以爲吉
兆穴下相通取左穴水則右穴水涸取右亦然又山
下有一石狀如鼻二泉出焉一溫一涼號爲玉泉故
又名玉泉山

博雨山

博南山在永平縣西南四十里一名金浪顛山一名
丁當丁山極爲險隘乃蒲蠻出沒之所

瀾滄江

瀾滄江經司城東北八十五里羅岷山下漢明帝兵
開博南行者愁怨作歌漢德廣開不賓度博南越瀾
津渡瀾滄爲他人渡舊處以竹索爲橋後廢 本朝
洪武末鎮撫華岳鑄三鐵柱於岸岸以維舟

方丈山

方丈山在鶴慶府城南一百里巍然峻拔山半有

中有池深不可測水滴岩下如方響音昔蒙氏羅閣
鳳琢觀音像於壁故又名觀音山南詔名山凡十七
此其一也

蒙樂山

蒙樂山在景東府北九十里一名無量山高不可躋
連亘三百餘里中有石洞深不可測一峰特出狀若
崆峒蒙氏封爲南岳其南有泉爲通華河其北有泉
爲清水河俱東入于大河

烏蒙山

雲南山川志入

烏蒙山在祿勸州東北三百里一名絳雲露山北臨
金沙江山有十二峯聳秀爲一州諸山之冠八九月
間常有雪其頂有烏龍泉下流爲烏龍河蒙氏封此
山爲東岳

高黎共山

高黎共山在司城東北一百二十里一名崑崙岡
語訛爲高良公山極高峻介騰衝潞江之間冬月潞
江無霜其山頂霜雪極爲嚴冽蒙氏封爲西岳其頂
有分水泉極清冽行者咸掬飲之

卧獅山

卧獅山在法寶山之南五里以形名高百丈餘袤二里其山俗名卧獅窩其下有洞口芭蕉廣二尋高稱之入深百五十步其中石乳燦爛有如蓮如鐘如傘之異故又名石花

雲巖山

雲巖山在城北二十五里高二百丈餘盤爲三里許襟水陰森巖石深百步中有石橫卧于下長丈餘好事者聚而爲佛建寺以覆之扁曰雲岩卧佛其左有

洞洞門高三尺深十丈餘寺外築臺建門臺下有池
東望沈湫足爲佳麗

羅岷

羅岷在城北八十里卽蘭滄江西岸高千丈餘延袤
四十里舊傳蒙氏時有僧自天竺來者名羅岷常作
戲舞山石亦隨而舞後沒于此後人爲之立祠祀之
岩下時墜飛石過者驚趨俗謂之催行石按飛石本
岩上野獸拋踏而下相傳有人於將曉時見石自江
中飛上霧中甚多羅岷之南爲險山勢極峻絕邇年

循鳥道闢仄路以通往來行人便之

易羅池

易羅池在龍泉門外瞰九隆山麓泉由地噴者九竇
滾滾沸出不舍晝夜郡人神之因名曰九龍池周遭
甃以磚石內有荷花夏月盛開西岸有二亭其一舊
名觀瀾御史於汝登重建題曰龍池春曉其一跨沸
泉之上舊名惜樂副使郭春震重建題曰九龍清派
泉石澄澈游人絡繹足爲一方形勝

金陵冬遊記畧

明 羅洪先

嘉靖己亥余當赴官僚命鄒東郭唐荆川有聯舟之約自念山中難索嘉會難逢閏七月十八日登舟十月二日始抵鎮江聞二兄既遠去王龍溪在南京書來邀會與胡大徵同往赴之鎮江諸友至樂亭餞別是夜宿炭渚驛對長松孤月頗有懷人之感初七日宿東流寺遣人入城約龍溪與王鯉湖會初九日午龍溪鯉湖至十一日邀余觀都城勝槩薄午至麒麟

門入觀音寺十二日與鯉湖遊靈谷寺由松徑入五里許至殿前觀吳偉畫廊及後寶誌塔後有八功德水午後龍溪始來同登無梁殿校射拜中暮宿月泉方丈十三日遊禪堂諸禪請作浴浴罷登禪床皆熟寐寐覺諸禪作齋供訖移宿退居十五日由龍潭買小舟破浪下儀真二十三日追徐波石戚南山至金山不遇未幾南山書來邀會十一月初十舟到儀真爲大風所阻林東城書來期歲暮入安豐十七日與盛範卿盧天啓聯騎趨全椒十九日午抵全椒宿南

山家塾二十一日同南山適南京暮抵江浦縣白馬寺寺中有白沙先生手書碑當時與莊定山諸公相會處南山曰前此龍溪荆川皆常宿此夜與南山論及斷欲處南山大省發喜曰白馬殊不虛行二十二日大霧渡江上下四顧不辨天水色若遊混沌午入報恩寺西方丈二十三日早余與南山觀殿外講廊有二僧說諸相出處大抵皆苦行得道事已而同登寶塔至九層上是日大風塔窻中不能開目余乃徹窻瞑坐久之從四窻各開半戶盤辟竊觀終不能盡

有頃風稍定余從塔窻扶欄楯周視之北指石城南
控雨花東望鍾陵西臨天塹而塔僧復次第細細區
別於是頗盡金陵全勢因與南山靜坐論六朝興敗
事撫時感激日旻南山先下余留坐塔中久之始去
二十四日余與南山間行入徐府菴出寺由春牛廠
三官廟入高座寺午飯罷覬方丈中荆川所留詩復
從寺後登雨花臺指顧山川廻旋盤礴徘徊久之下
臺入天界寺新菴中熟卧禪榻二十五日與南山過
大教場習射射畢入神樂觀觀天地壇返宿陸壽卿

方丈二十六日早投報單入孝陵余素服行謁陵禮
飯夏太監宅夏乃鄉人飯罷其侄云尚有懿文皇太
子陵由孝陵左折東下行叩頭禮出遇屈奉御引余
達觀陵外規制并指吳王孫權所葬處爲之悲悼今
昔令人輕世二十七日由洪武門入訪南衙諸老會
章介菴談吐多感激與龍溪論及詩文龍溪曰荆川
近拚得下縱彼終日執筆總是輕念菴縱終年不作
總是重余初不肯服已而察之果然二十八日過雞
鳴山欲登覽以甘泉翁處促飯不及登席中因陳欲

根難斷處翁云自有知來欲卽相染歲復一歲已成
深病而今無有頓去法亦惟漸次歲減一歲耳已而
論及安南事因出治權論見示夜宿龍溪家二十九
日謁唐有懷翁語次每慮荆川過高不近人情處余
曰在令郎不可有在今世不可無語罷余解衣冠獨
乘馬山洪武門外阡陌中欲避謝人事投普照寺龍
溪南山不之知也三十日與南山及盧子同遊牛首
自鳳臺門出西臯使人邀至萬歲寺午飯罷同步至
祝禧寺瞻觀楞伽經十二月初一日西臯別去余三

人跨馬逶迤循山而行有頃抵牛首至峻級處始下馬古杉喬松蕭森屏列循街而上至住持方丈中熟睡睡覺從方丈左折登塔殿殿後依石壁左角有小徑緣石而上從石穴中出上有小石塔石四旁方平僅容人行名舍身崖余與南山次第登之盧子收粟不敢上坐少頃復從石穴下由殿外左折登憑虛閣又折而上入文殊洞出洞憑簷廊立夕陽倒射廊中天光下臨遠近嵐烟映暈林木遠水橫帶暮鳥分歸大奇景也出廊西右折橫過山腰有僧結茅菴獨坐

與之語亦稍知自謀者宛復而西觀辟支洞洞甚小
且傾仄下至禪堂已昏黑則開龍溪至矣初二日早
起就禪堂前右室中閉門觀塔影影從門孔中入倒
懸向下無問陰晴皆得見之已而諸公各乘輿登眺
余與盧子從石徑上山頂觀佛眼水水在石孔中出
甚清潔深數尺許而是石皆有鉛銹光盧子恐怖不
敢近視余盤踞坐其上俯而下視崖石千仞少頃登
絕頂坐盤石上北望鍾陵烟雲羃其下獨露山頂若
螺髻然周迴四顧廣漠無際龍溪笑曰可謂下視人

荒矣方欲長歌而諸公使人邀下就席飲罷予乘肩輿過獻花崖而龍溪南山先入祖堂余與盧子觀諸崖洞登芙蓉閣反視牛首山樓閣秀麗若畫凭欄久之復由山左轉入祖堂寺僧海天延入方丈設齋供畢同入禪堂觀諸僧鍊魔皆數日夜始一休因感悟自己悠悠處初三日同觀懶融洞中一石書佛字乃四祖點化懶融處余三人依石而坐適道人唱道詞皆警世語令人心思冷然出洞觀無梁殿乃海天所創歸方丈各跨馬過嶺復入獻花崖二公登陟余

止茅菴中已而由翠濤軒玩竹又從寺左右磴下遂
由紅石經馴象門而西趨華嚴寺至則天復晴朗初
四日龍溪早別去余三人由江東門外普惠寺陸行
入水西門訪西阜飯罷遊西園次早同西阜遊朝天
宮宮西偏有卞將軍墓墓前爲祠由祠前去靈應觀
登觀後臺聊鳥龍潭望清涼山以天將雨不及登遂
出清涼門四人共乘小艇北觀石頭城有頃天微雨
共持一盞自蔽將暮抵靜海寺宿對山方丈初六日
大風雪橫沙凌晨携酒殺出餞西阜先別去將暮橫

沙別入城余四人同遊方丈前小圃列坐洞中時風
雪交至悠然有塵外之樂初七日雪龍溪至餞於方
丈別院飲罷令余大書菊坡警語并余途中詩爲別
初八日雪霽余四人同乘小舟遊觀音山午後始達
遂登岸憑觀音閣望江流瀾瀾時天正寒汀洲蕭疎
帆檣寥闐因步至觀音門望獅子山積雪日沉西登
燕子磯絕頂將暮宿道院中初九日早各拜別南山
龍溪送余至磯下登小舟戀戀不能舍去是日江風
尚微薄暮抵儀真夜宿見齋客舍初十日飯莫中江

處夜半發舟十一日大雪至揚州乘雪訪吳疎山竊
念自丙戌以來致力此學當時自負意氣謂聖域舉
足可入每懷五嶽願志四方十四年來茫無所成卽
恐日就淪逝終成狂謬因書所聞并以示鄉里同志

蜀都雜抄

雲間陸深

蜀人多姓奇今百家姓以爲出於宋朝故首以趙錢
孫李尊國姓也我朝千家姓亦以朱奉天運起文
然未見有天姓者而蜀姓或有出於二家外自魏晉
以來取才於門閥故姓氏尤重唐重八姓論相於此
至不許與他姓爲婚姻自八姓而下凡有三百五十
姓宋嘉祐中亦有千姓編鴈門邵思撰姓解則分爲
一百七十門至有二千五百六十八氏漢潁川太守

聊氏復有萬姓譚古姓之存於今者鮮矣按左氏之
生賜姓胙土命氏以字以謚以官以邑才五者而已
峨眉山本以兩山相對如蛾眉故名字當从虫不當
从山

月竹嘉定州之產每月生笋

吾郡松江本緣淞江得名其地下每有水災乃去水
而作郡吳淞江今吳江寶帶橋一路是已亦名松陵
眉州有江亦名松江卽蜀江分派過州城與體泉江

合

嘉靖十五年丙申春二月二十八日癸丑四更點鐘
盡地震者三初震房屋有聲鷄犬皆鳴隨以天鼓
西北而南後數日得報惟建昌尤甚城廓廨宇皆傾
死者數千人都司李某亦與焉

蜀都大抵雨多風少故竹樹皆修聳少陵古柏二千
尺人訊其瘦長詩固有放言要之屬產與他迥異者
謂栢之森森者惟蜀爲然所謂喬木如山者亦惟蜀
爲然

楊柳多奇生狀類冬青亦似紫藤經冬不凋春夏之

變作紫花散落滿地省衙前有數株冬月望之榮枯
各異

峨眉山周廻千里高八十里中有光怪每天晴雲湧
浩若銀河其光五采如輪俗云佛見是已夜半有光
燭燭來自天際者又謂之聖燈光相寺在絕頂
登其處遙望之西天見雪山一云有小鳥如鷓鴣鳴
類人言一云自白水躍其巔六十里

峨眉古今之勝境也山中光怪若虹蜺然每見十雲
日映射之俗際所謂佛光者是已予自陝入川巡撫

陝西興都憲臣有鄰爲予言曩爲川轄時親登其上
觀佛光光未發時有鳥先飛過若言施主發心菩薩
來到光旣散復來作聲施主布施菩薩去了又拾藏
山中白石大小皆六稜照耀有光采疑光怪卽此石
所謂也理當或然但鳥聲何爲者耶近余編修承勛
懋昭爲余言嘗從楊修撰愼川修兩宿其上登絕頂
亦見光具五色俯視在雲壑中其言白石與黃都憲
同惟云鳥聲只三字若言佛現了其鳥類雀而稍大
只有三枚別無種類三鳥飛入佛殿中嘗就僧食似

不見有長育耳佛殿自西望見三峯插天皆積雪如銀每日下峯頭則殿中燃燈云此西域崑崙山豈所謂日月相掩映爲晝夜者耶夏日從北峯西下冬日從南峯惟春秋之間從中峯下不寒云西域本此尚遠恐目力難及今省城西望亦有雪山聳出晴霽時可見疊茂才三百里爾宋田錫賦詩云高高百里作一盤八十四盤青雲端豈以至高求至高耶東坡亦云峨眉山西雪千里今峨眉當省城南東三百餘里而城樓登望不及要之言八十里六十里者近是

同年安給事磐字公石作州志亦云有白石如泰山之狼牙上饒之水晶之類置之日隙則有五色光日中則無僧曰佛現者此也予近覓視之大類水晶嘉定高任說會言亦云施主佛現施主請回

夾江縣之伏龜山有仙掌洞今稱紫府洞是已其山雲常五色黃色居其中亦佛光之類耶

蜀中山水稱嘉定自古名人寓居其間漢則楊子雲晉則郭景純唐則李太白宋則蘇東坡黃山谷晁公武

咸淳間文尚忠字敦詩隱居夾江愛邑西江山之勝
並大觀堂築二亭前臨翠嶺下瞰大江暇則擊鮮治
具招避地名勝相與登臨觴咏爲樂

五塊石在今萬里橋之西其一人地上疊四石俱方
或云其下有一井相傳以爲海眼其南卽漢昭烈陵
予疑是當時作陵時所餘嘉定州之金銀岡亦有所
謂五塊石

黎州安撫司內小廳東有梨樹一株高九丈圍九尺
州人取其枝以接果豈黎以梨名耶州人呼爲三藏

梨相傳爲唐僧西遊植梨杖於此曰化日州治在此
恐非實事古稱黎杖黎卽首宿養之歷霜雪經一二
歲木本修直生鬼面可杖取其經而堅非梨木也
嘉定州有烏一名山和尚一名雨道士堪作對偶
大藏西域記云阿耨達池在香山之南大雪山北周
八百里東南流入海者曰疏加河西南流入海者曰
縛芻河西北流入海者曰徙多河又潛流地下出積
石山東北流入海者爲中國之河源阿耨達華言無
煩惱似指所謂星宿海者疏伽華言天堂縛芻華言

青從多華言冷

梵文甚細如叙果有五棗杏等謂之核果梨柰等謂之膚果椰子胡桃等謂之殼果松子栢仁等謂之櫨果大小豆等謂之角果核殼易解膚皮膚可啖也角攀言亦稱豆角惟櫨頗異按字書空外反龜糠皮謂之櫨豈取義攀梵不能無相通云

金王子可南云咏西瓜云一片冷裁潭底月六灣斜捲脫頭雲又在元世祖前矣

深淵離淺作腰六言石刻在灌縣相傳以爲奏李冰

鑿離堆以利蜀時所爲此恐後人所爲非古詞也至於節宣水利無過此言

蜀城謂之芙蓉城傳自孟氏今城上間栽有數株兩歲著花子適開視見之皆淺紅一色花亦凋瘵殊不若吳中之爛然數色也

支机石在蜀城西南隅石牛寺之側出土而立高可五尺餘石微紫近土有一窩傍刻支机石三篆文似是唐人書跡想曾橫置故刻字如之事本荒唐此石蓋出傳會然亦舊物也

天涯石在城東門內寶光寺東之側有亭覆之舊志
以爲在寧州衛李小旗家問之蜀人莫詳所始意亦
萬里橋之類行旅之人志遠也石首銳而微頑爾
自複姓之外有三字姓如侯莫陳費也頭吐谷渾之
類四字姓則有白死獨膊井虱六斤皆以爲之姓夫
中國無衍語一言見一義多侈辭數言見一義
或曰中國用文字有定形用聲音有長短
日行黃道月行月道月道交絡黃道外十三日有奇
而入經黃道謂之交朔凡月之行歷二十九日五十

三分而與日相會謂之令朔

正字以一止爲文前代多譌之如齊文宣之子殷字
正道歎曰吾兒其替乎後果不終梁武陵王收元曰
天正識者以爲一年而收此亂亡之事或出偶然考
之帝王建元自漢武始兩漢之世無有以正紀年者
至魏齊王芳收元曰正始高貴卿公曰正元竟俱不
祥金煬王有正元正隆之號金哀宗亡國之年亦曰
正大元順帝終於至正豈盡偶然耶後世臨文亦稍
避所謂宰相須用讀書人也

李侍御鳳翔號五石其居近五塊石故云予問成都石筍遺跡五石指五塊石是也與少陵所賦石筍行不肖又云五塊爲南筍天涯石爲北筍云

永嘉林石介夫婆娑泉石間作萱堂以養母客至竹床瓦豆具酒款延之佳山水無不到獨不到郡縣

宋寧宗嘉定十三年興元軍士張福與其黨莫簡作亂以紅巾爲號

予嘗欲取今之州縣推而上之以會于禹貢之命名固以著古今離合遷改之實爲一書宋浦江倪朴文

卿嘗作輿地會元志四十卷惜當時以布衣著書力
不能傳其自叙有曰今學者大抵急於利祿而書務
於時文故不識者不肯目而識者未暇觀也其言亦
可悲矣

撫州出兩大儒前有王荆文公安石後有吳文正公
澄向使荆公無熙豐之事文正高不仕之節皆程朱
等輩人也荆公值宋祚將衰故釀禍多文正當元運
方隆故享福盛此士難以成敗論也

范文穆公成大當宋孝宗時起福州陞對論力

之所及者三曰日力曰國力曰天力今盡以虛文耗之不知一時所指者何事後世讀之令人有流涕者進宋史表或云歐陽玄所爲最警策者是聲容盛而武備衰論建多而成効少不若議論多而成功少差爲渾成至齊亡而蒔王蠲乃存秉節之臣楚滅而論魯公莊矜守禮之國溫厚典雅之旨尤爲蕭然一時史官若張翥吳當號稱博洽而危素亦與焉

姚牧蒺藜送暢純序稱先師賞其辭而戒之曰弓矢爲物以待盜也使盜得之亦待其人文章固殺聞士

子之利器然先有能一世之名將何以應人之見役者哉非其人而與之與非其人而拒之釣罪也非周身斯世之道也其論極爲痛切收菴嘗受業劉靜修先師必靜修今文集中無此議論

嶧嶧潛沱之義難解今蜀山連綿延亘凡居左者皆曰岷右者皆曰嶧凡水出於岷者皆曰江出於嶧者皆曰漢江別流而復合者皆曰沱漢別流而復合者皆曰潛恐屬方言爾故岷謂之汶今汶川是也漢謂之漾或謂之沔或謂之羌今沿漢水而東有寧羌州

有沔縣又東有洋縣卽古洋州也洋漾聲相近豈皆得名於漢水云

按華陽國志云漢有二源東源出武都氐道漾山因名漾禹貢流漾爲漢是也西源出隴西嶓冢山會白水經葭萌入漢始源曰沔故曰漢沔

楠木材巨而良其枝葉亦森秀可翫成都人家庭院多植之有成行列者其枝葉若相迴避然謂之讓木文路公詩所謂移植虞芮間者以此

成都學宮前綽楔題曰神禹鄉邠子始至視學見而

疑之昔堯舜禹嗣興冀爲中州兩河之間聲教暨焉
而輿地尙未拓也後千餘年而周始有江漢之化至
秦盛強蜀始通焉彼所謂蠶叢魚鳧靈聖帝者文
物未備且在秦周之世蜀之先可知也禹都在今之
安邑鯨實四嶽封爲崇伯崇今之鄂縣其地遼絕何
得禹生於此乎新志亦以此爲疑問之人士皆曰禹
生於汶川之不紐村禹穴在焉檢舊志稱唐元和志
廣柔縣有不紐村禹所生也以六月六日爲降誕云
是蓋凡於巫覡之談至宋計有功作禹廟碑始大書

曰崇伯得有莘氏女治水行天下而禹生於此其言頗爲無據有莘氏於鯀亦不經見按莘今之陳畱與崇近縣娶當或有之鯀爲諸侯厥有封守九載弗績多在河北今諸處之鯀城是已安得治水行天下乎又安得以室家自隨荒裔之地如石紐者乎予益疑之雖有功亦曰稽諸人事理或疑然蓋疑詞也此必承元和志之誤而後說益紛紛此雖於事無所損益而蜀故不可以不辯按楊雄蜀都賦止云禹治其江左思三都所賦人物奇若相如君平文若王褒楊雄

怪若長弘杜宇僭若公孫劉璋皆列獨不及禹生耶
至宋王騰不平左詞作賦致辯頗極辭鋒亦云岷山
導江歷經營於禹蹟其後云鯀爲父而禹子此槩人
倫之辯爾亦不言禹所生也又按華陽國志載禹治
水命巴蜀以屬梁州禹娶於塗山辛壬癸甲而亥生
子啓呱呱啼不及視三過其門而不入室務在救時
今江州之塗山是也帶禹之廟銘存焉志作於晉常
璩可謂博雅矣况留意蜀之材賢然亦不云禹所生
也今徒以石紐有禹穴二字證之又安之非後人所

爲耶禹穴實在今會稽窆石在焉古稱穴居衆詞也
禹平水土時已爲司空恐不穴居今言穴蓋葬處非
生處也古今集記則云岷山水源分二派正南入湓
村至石紐過汝川則禹之所導江也由是言之石紐
蓋禹蹟之始而非謂禹所生也又按塗山亦有數說
江州今重慶之巴縣有山曰塗鳳陽之懷遠古鍾離
也自有塗山啓母石在焉汀州治水所經鍾離帝都
爲迹未知孰是蘓鶚又云塗山有四皆禹跡也併堦
會稽典當塗云宋景濂游山記甚詳然亦不能決孔

安國曰塗山國名非山也史記所載啓禹之子其母塗山氏之女又似姓氏猶今司馬氏歐陽氏之謂恐亦非國名也聊附所疑於此

嘗聞前輩云本朝國體與前代不同者三事其一

指北以爲不可一日忘備漢唐故事但驅出境外而已近得戶部移文開稱宣府歲用銀九十二萬五千九百餘兩大同歲用銀九十九萬二千四百六十餘兩遼東歲用銀三十九萬四千八百七十餘兩延綏歲用糧料五十二萬一千三十六石零寧夏歲用

糧料五十三萬四千二百五石草三百九十三萬九千六百餘束甘肅歲用糧料六十九萬七千六百零草五百二十萬三千八百五十四束大約歲費四百餘萬而隨時用兵不與焉

今上大工之費近得工部總計九十餘萬只大本一項四川已用九十萬尚須九十萬可足川之民力可念也

貴州金竺長官司有僧寺曰羅永菴有一僧題二詩於壁間曰風塵一夕忽南侵天命潛移四海心鳳返

丹山紅日遶龍歸滄海碧雲深紫微有象星還拱山
漏無聲水自沈遙想禁城今夜月六宮猶望翠華臨
閒罷楞嚴磬懶敲笑看黃犀背團瓢南來瘴嶺千層
迴北望天門萬里遙欵段久忘飛鳳輦袈裟新換袈
龍袍百官此日知何處惟有羣鳥早晚朝人知爲建
文君僧遂避公其詩至今畱菴中衛方伯正夫傳其
事漫記之以備一說

豫章漫抄

吳郡陸深

今人家池塘所蓄魚其種皆出九河謂之魚苗或曰
魚秧南至關廣北越淮泗東至于海無別種也蓋江
湖交會之間氣候所鍾每歲於三月初旬罷取魚苗
其細如髮養之舟中漸次長成亦有羸縮其利
九江設廠以課之洪武十四年 欽差總旗王道兒
等至府緝僉漁人謂之縵戶

甲午十月四日月過安仁偶讀書坊宋學士文集諸

版語有云區區富貴能幾何乃無所忌憚至於如此
墓骨已朽覽其官氏人猶指議之不覺感嘆

五日未半大陽二十里已過龜峯溪下時新月在未
位木星入之頃刻遂出西行是日月躔牛二十度木
星尚在初度七日方交一度當是太陰亢疾所致又
明日過鉛山見費少師鵝湖首問及此彼以爲星與
月相去才五度云

木各有土宜于行清化見柿樹衢州之橘田皆異他
產饒州之間柏亦異冬初葉結子放蟻好類作

字裂一叢有數顆望之若梅花 鉉枝回曲
野水亂石之間遠近成林真可貴也

吾鄉諺云斤九釐川以日時人之精慧者不知所本
弋陽德興產梨頗大有至一斤九兩者土人謂之斤
九梨蓋取其類之大者言之猶芋言魁也

趙善鳴字元默與同年湛元明俱出陳曰沙之門三
十年前因元明識其人甲午春以南京戶部員外公
差過豫章出許司徒函谷所刻論辯爲惠始得盡見
一時賢俊論學之說予向嘗疑氣以成形而理亦賦

馬爲有語病今諸公併以性卽理也一言爲不通之
論大抵義理之學要在悅心處如登山然高一步則
所見自別若未至其地而議之何益之有山谷至以
太極圖爲周子之真贋實犯此何言與

予往歲謫延平北歸宿建陽公館時薛宗鑑作令與
小酌堂後軒是歲園中大雪四山皓白而芭蕉一株
橫映粉牆盛開紅花名美人蕉世稱王維雪蕉畫爲
奇格而不知冒雪看花乃實境也

九江德安縣布政分司有松當月臺之左合抱餘不

甚聳拔而西偏杓出一枝作假蓋曲屈盤旋類人力
所爲遠望之若鵲巢然土人以爲有茯苓云其可愛
翫古稱松千年乃假蓋果然耶問之葉子奇云松有
命根遇石則假蓋不必千年也再過開先寺道旁長
松二百餘株一徑森然若龍起就列大者數圍其細
瘦者亦不下徑尺相傳本後主所植亦已五百餘年
矣此皆江西嘉木也

鄱湖之濱民以巨簣漁乃洞其底以簣承之設逆簣
焉使魚能入而不能出也上施轆轤網而觀魚之

有無以漸約致魚之初失水也跳躍不已以漸約至
下入筍而水始裕而不知死地之近也陷民於罪何
以異是故曰法網

元至正初史館遣屬官馳驛求書東南異書頗出時
有蜀帥紐鄰之孫盡出其家貲徧遊江南四五年間
得書三十萬卷迴峽歸蜀可謂富矣今江西在江南
號稱文獻故邦子來訪之藏書甚少間有一二往往
新自北方載至亦無甚奇書而浙中猶爲彼善若吾
中則有群集有精美者矣

楊文公億登千越亭歎曰長洲茅屋曲水漁簪樓閣
參差峯巒遠近或白雲或返照或殘雪在樹或微雨
弄晴朝暮掩映誠絕境也予自僊城陸行南至餘千
良川流水平林遠山觸目藹藹千越亭久廢今爲學
官下臨琵琶州朱子注楚詞之地溪水自玉山來者
匯在十里外宛有退避之意文公品題要爲寶錄

都少卿玄敬南濠先生嘗云家有宋抄京房易傳許
偕未償比於鄱陽余小子積家錄之於易無所發
明蓋亦自成一家言卦分世應起星氣筭位卽今世

星卜五鄉六親之術小數也而文理微密比太玄頗爲易簡云

鐵柱宮在江西省城東南隅宮之東南隅方丈甃池作石闌檻鐵柱在焉相傳爲許旌陽治蛟之物甲午冬初予與同僚偶往俯觀焉微露其端乃石爾非鐵也亦不作柱形豈厭勝所爲與